

## **Tahi Beebaa go Chronicles Hanu dagodo o de beebaa nei**

De gau Ssuu e tala bolo go Ezra ne siia *Tahi* ma de *Lua Beebaa go Chronicles*, i daha de ngadau e 430 B.C., ga daohi ai mee ne hai mai i 1000-960 B.C. Gai e aahe ange ma e tala mee gu sisi i lodo luu beebaa go Samuel, aama luu beebaa o denga Hodoologi, gai e damaa dagodo gee de hai e tala ai. E lua hiidinga ne sisi ai taalanga o de nohoanga hodoologi o de gau Israel i lodo luu beebaa go *Chronicles*:

1. E hagaago mai bolo e dee galemu donu de lagolago hai ngadaa o luu nohoanga hodoologi o Israel ma Judah, gai de Maadua goi daohi donu huu ana hagatoo donu ange gi de huua-henua laa. Gai ia e hagahai hegau dana hagatau ange gi ono dangada, i daho dangada goi nnoho laa i Judah. Tangada ne siia de beebaa nei ne tilo hegau a David ma Solomon ne hai, ma hegau a Jehoshaphat, ma Hezekiah, ma Josiah, e haggammahi ange ai dangada goi hai hegau ange laa gi de Maadua i de lodo abodonu.
2. E tala mai hogi taamada de daumaha ange gi de Maadua i lo te *temple* i Jerusalem, ma de hai ne hagatau ai hegau a de gau haimeedabu ma de aamuli o Levi, i delaadeu dagi dangada e daumaha ai. Gai e tala hogi bolo go David ne damadaa de hai de *temple*, ma ono hegau

alodahi, e dee galemu donu go Solomon ne hagaduulia de *temple*.

Dahi gubu hagamogomogo: “Gai David gu donu iho bolo TAGI MAOLUNGA gu hagasula ia gi hodooligi i hongga Israel, gai dono nohoanga hodooligi gu hagamaolunga, i hiidinga o ono dangada go de gau Israel” (14.2).

### **Denga vaevaenga**

Denga atangada ma olaadeu hagataaunga (1.1–9.44)

De magau o Saul (10.1-14)

De hodooligi o David (11.1–29.30)

a. Denga hai ngadaa ma hegau ne ssula (11.1–22.1)

b. De hagadabena mee e hagaduu ai de *temple*(22.2–29.30)

### *Denga hagadiilinga mai i Adam gi Abraham (Gen 5.1-32; 10.1-32; 11.10-26)*

<sup>1</sup> Adam, Seth, Enosh,

<sup>2</sup> Kenan, Mahalalel, Jared,

<sup>3</sup> Enoch, Methuselah, Lamek, ma Noah.

<sup>4</sup> Dama daane a Noah: go Shem, ma Ham, aama Japheth.

### *Hagadiilinga o Japheth*

<sup>5</sup> Dama daane a Japheth: go Gomer, ma Magog, ma Madai, ma Javan, ma Tubal, ma Meshek, aama Tiras.

<sup>6</sup> Dama daane a Gomer: go Ashkenaz, ma Riphath,\* aama Togarmah.

---

\* **1:6** *Riphath*: hanu beebaa Hebrew ange laa e hai ange *Diphath*.

<sup>7</sup> Dama daane a Javan: go Elishah, ma Tarshish, ma Kittim, aama Rodanim.

*Hagadiilinga o Ham*

<sup>8</sup> Dama daane a Ham: go Cush, ma Egypt, ma Put, aama Canaan.

<sup>9</sup> Dama daane a Cush: go Seba, ma Havilah, ma Sabta, ma Raamah, aama Sabteca.

Dama daane a Raamah: go Sheba, ma Dedan.

<sup>10</sup> Cush ne hagdili Nimrod; gai Nimrod se daane mmahi i henua i lalo.

<sup>11</sup> Egypt ne hagdili de gau Lud, ma de gau Anam, ma de gau Lehab, ma de gau Naphtuh,

<sup>12</sup> ma de gau Pathrus, ma de gau Casluh (ne hagdili ai laa de gau Philistia), ma de gau Caphtor.

<sup>13</sup> Canaan ne hagdili de gau Sidon, dana dama madua, ma de gau Heth,

<sup>14</sup> ma de gau Jebus, ma de gau Amor, ma de gau Girgash,

<sup>15</sup> ma de gau Hiv, ma de gau Erek, ma de gau Sin,

<sup>16</sup> ma de gau Arvad, ma de gau Zemar, aama de gau Hamath.

*Hagadiilinga o Shem*

<sup>17</sup> Dama daane a Shem: go Elam, ma Asshur, ma Arpaxad, ma Lud, ma Aram.

Dama daane a Aram: go Uz, ma Hul, ma Gether, aama Meshek.

<sup>18</sup> Arpaxad ne hagdili Shelah, gai Shelah ne hagdili Eber.

<sup>19</sup> Eber ne hagdili e dogolua dama daane. De ingoo o dahi go Peleg<sup>†</sup> (go hiidinga dangada

<sup>†</sup> **1:19** Peleg i muna Hebrew e bei go *de vvae*.

o henua i lalo ne mavaevae i dono masavaa),  
 gai de ingoo o dono daina go Joktan.  
 20 Joktan ne hagadili Almodad, ma Sheleph, ma  
 Hazarmaveth, ma Jerah,  
 21 ma Hadoram, ma Uzal, ma Diklah,  
 22 ma Ebal, ma Abimael, ma Sheba,  
 23 ma Ophir, ma Havilah, aama Jobab. Aanei  
 alodahi dama a Joktan.

24 Shem, Arphaxad, Cainan, Selah,  
 25 Eber, Peleg, Reu,  
 26 Serug, Nahor, Terah,  
 27 ma Abram (e bei go Abraham).

### *Hagadiilinga o Ismael*

*(Gen 25.12-16)*

28 Dama a Abraham go Isaac ma Ishmael.  
 29 Aanei dama a Ishmael: go Nebaioth, dana  
 dama madua, ma Kedar, ma Adbeel, ma Mib-  
 sam,  
 30 ma Mishma, ma Dumah, ma Massa, ma  
 Hadad, ma Tema,  
 31 ma Jetur, ma Naphish, aama Kedemah. Aanei  
 dama a Ishmael.  
 32 Gai dama daane a Abraham ange gi Keturah,  
 dono bodu laa daha: go Zimran, ma Jokshan,  
 ma Medan, ma Midian, ma Ishbak, aama  
 Shuah.  
 Dama daane a Jokshan: go Sheba ma Dedan.  
 33 Dama daane a Midian: go Ephah, ma Epher,  
 ma Hanok, ma Abida, aama Eldaah.  
 Aanei alodahi dama a Keturah.

### *Hagadiilinga o Esau*

*(Gen 36.1-19)*

- 34 Abraham ne hagdili Isaac.  
Gai dama daane a Isaac go Esau ma Israel.
- 35 Dama daane a Esau: go Eliphaz, ma Reuel, ma Jeush, ma Jalam, aama Korah.
- 36 Dama daane a Eliphaz: go Teman, ma Omar, ma Zephi, ma Gatam, ma Kenaz. Tama daane a Timnah: go Amalek.
- 37 Dama daane a Reuel: go Nahath, ma Zerah, ma Shammah, aama Mizzah.

*Dangada o Seir i Edom*  
(Gen 36.20-30)

- 38 Dama daane a Seir: go Lotan, ma Shobal, ma Zibeon, ma Anah, ma Dishon, ma Ezer, aama Dishan.
- 39 Dama daane a Lotan: go Hori, aama Homam. Gai Timna go taina hahine o Lotan.
- 40 Dama daane a Shobal: go Alvan, ma Manahath, ma Ebal, ma Shepho, aama Onam. Dama daane a Zibeon: go Aiah, ma Anah.
- 41 Tama daane a Anah: go Dishon. Dama daane a Dishon: go Hamran, ma Eshban, ma Ithran, aama Keran.
- 42 Dama daane a Ezer: go Bilhan, ma Zaavan, aama Jaakan. Gai dama daane a Dishan go Uz ma Aran.

*Denga dagi o Edom*  
(Gen 36.31-43)

- 43 Gai aanei denga hodoologi ne dagina de henua go Edom i mua de dahi hodoologi o de gau Israel: go Bela, tama daane a Beor, gai de ingoo o dono aduhale go Dinhabah.

- 44 Gai ga magau huu Bela, gai Jobab, tama daane a Zerah, taane Bozrah ga sui ia ga hodoologi ai.
- 45 Gai ga magau huu Jobab, gai Husham, taane mai i de henua go Teman ga sui ia ga hodoologi ai.
- 46 Gai ga magau huu Husham, gai Hadad, tama daane a Bedad, taane ne hagadee kii ina laa de gau Midian i de henua go Moab, ga sui ia ga hodoologi ai. Gai de ingoo o dono aduhale go Avith.
- 47 Gai ga magau huu Hadad, gai Samlah taane Masrekah ga sui ia ga hodoologi ai.
- 48 Gai ga magau huu Samlah, gai Shaul, taane mai i Rehoboth i gaogao ssaalingaa vai, ga sui ia ga hodoologi ai.
- 49 Gai ga magau huu Shaul, gai Baal-Hanan, tama daane a Achor ga sui ia ga hodoologi ai.
- 50 Gai ga magau huu Baal-Hanan, gai Hadad ga sui ia ga hodoologi ai. Gai de ingoo o dono aduhale go Pai, gai de ingoo o dono bodu go Mehetabel, tamaa hine a Matred, tamaa hine a Me-Zahab.
- 51 Gai Hadad gu magau hogi.

Gai denga dagi o Edom: go Timna, ma Alvah, ma Jetheth,

52 ma Oholibamah, ma Elah, ma Pinon,

53 ma Kenaz, ma Teman, ma Mibzar,

54 ma Magdiel, aama Iram. Aanei dagi o de gau Edom.

## 2

*Dama a Israel*

<sup>1</sup> Aanei dama daane a Israel: go Reuben, ma Simeon, ma Levi, ma Judah, ma Issachar, ma Zebulun,

<sup>2</sup> ma Dan, ma Joseph, ma Benjamin, ma Naphtali, ma Gad, aama Asher.

*Dama daane a Judah*

<sup>3</sup> Dama daane a Judah: go Er, ma Onan, aama Shelah ange gi tamaa hine a Shua, taane Canaan. Gai Er, tama madua a Judah, ne hai dahi hegau baubau i mada luu mada o TAGI MAOLUNGA, gai ia ga daa ia gu magau.

<sup>4</sup> Gai Tamar, saulaba o Judah ne haanau ange gi de ia Perez ma Zerah. Gai Judah ne dogolima alodahi ana dama daane.

<sup>5</sup> Dama daane a Perez: go Hezron, ma Hamul.

<sup>6</sup> Dama daane a Zerah: go Zimri, ma Ethan, ma Heman, ma Calcol, aama Dara; e dogolima ana dama alodahi.

<sup>7</sup> Dama daane a Carmi: go Achar,\* go taane ne haia ga hai ngadaa de gau Israel, i dana kave mee gu hagailonga e oha gi odi.\*

<sup>8</sup> Tama daane a Ethan: go Azariah.

<sup>9</sup> Dama daane a Hezron ne hagadili: go Jerahmeel, ma Ram, aama Kelubai.†

<sup>10</sup> Ram ne hagadili Amminadab, gai Amminadab ne hagadili Nahshon, dahi dagi o dangada o Judah.

<sup>11</sup> Nahshon ne hagadili Salmon,‡ Salmon ne hagadili Boaz,

---

\* **2:7** Achar e bei go Achan (diiloo Joshua 7.1).      \* **2:7** Josh 7.1

† **2:9** Kelubai, aabe go Caleb.      ‡ **2:11** Salmon, aabe go Salma i muna Hebrew.

<sup>12</sup> Boaz ne hagdili Obed, gai Obed ne hagdili Jesse.

<sup>13</sup> Jesse ne hagdili Eliab, dana dama madua, togolua dama go Abinadab, togodolu go Shimea,

<sup>14</sup> togohaa go Nethanel, togolima go Raddai,

<sup>15</sup> togoono go Ozem, gai togohidu go David.

<sup>16</sup> Gai luoolaadeu daina haahine go Zeruah ma Abigail. Dama daane a Zeruah go Abishai, ma Joab, ama Asahel.

<sup>17</sup> Gai Abigail ne haanau Amasa, gai tamana o Amasa go Jether, mai i de aamuli o Ishmael.

*Caleb tama daane a Hezron*

<sup>18</sup> Caleb, tama daane a Hezron, ne hanu hogi ana dama i daho dono bodu go Azubah (ama daho Jerioth). Gai ana dama daane: go Jeshar, ma Shobab, ama Ardon.

<sup>19</sup> Gai de masavaa huu o Azubah ne magau ai, gai Caleb ga hai bodu ange gi Ephrath, ga hagdili ai a Hur.

<sup>20</sup> Hur ne hagdili Uri, gai Uri ne hagdili Bezalel.

<sup>21</sup> Muli mai gai Hezron ne hai bodu ange hogi gi tamaa hine a Makir, tamana o Gilead (gu madaono ono ngadau i de masavaa oona ne hai bodu ange ai gi de hine laa), gai de hine laa ga haanau ange gi de ia Segub.

<sup>22</sup> Gai Segub ne hagdili Jair, taane ne dagina e madalua ma dolu aduhale i de ungaamee o Gilead.

<sup>23</sup> (Aagai Geshur ma Syria ne kave aduhale vaaligiligi o Jair, madali Kenath ma ono aduhale vaaligiligi – se madaono aduhale nei.) De gau nei alodahi ni hagdilinga niio Makir, tamana o Gilead.

24 Dua de magau o Hezron gai Caleb ne hai bodu ange gi Ephrathah, de bodu o dono damana go Hezron. Gai de hine laa ga haanau ange gi de ia Ashhur, taane ne hagaduulia Tekoa.

*Jerahmeel tama daane a Hezron*

- 25 Dama daane a Jerahmeel, tama madua a Hezron: go Ram, dana dama madua, ma Bunah, ma Oren, ma Ozem, aama Ahijah.
- 26 Gai Jerahmeel e dahi ange ono bodu, dono ingoo go Atarah, go ia tinana o Onam.
- 27 Dama daane a Ram, tama madua a Jerahmeel: go Maaz, ma Jamin, aama Eker.
- 28 Dama daane a Onam: go Shammai ma Jada. Dama daane a Shammai: go Nadab ma Abishur.
- 29 De ingoo o de bodu o Abishur go Abihail, gai ia ne haanau ange gi de ia Ahban ma Molid.
- 30 Dama daane a Nadab: go Seled ma Appaim. Gai Seled teai donu ana dama.
- 31 Tama daane a Appaim: go Ishi, go ia tamana o Sheshan. Gai tama daane a Sheshan: go Ahlai.
- 32 Dama daane a Jada, taina daane o Shammai: go Jether ma Jonathan. Gai Jether teai donu ana dama.
- 33 Dama daane a Jonathan: go Peleth ma Zaza. Aanei hagadiilinga o Jerahmeel.
- 34 Gai Sheshan teai donu ana dama daane, ni damaa hine donu huu aana. Gai Sheshan e dahi ono daane hai hegau mai i Egypt, dono ingoo go Jarha.
- 35 Gai Sheshan ne gaavange dana damaa hine e hai ai de bodu o dono dangada hai hegau go Jarha, gai ia ne haanau ange gi de ia Attai.
- 36 Attai ne hagadili Nathan,

Nathan ne hagadili Zabad,  
<sup>37</sup> Zabad ne hagadili Ephlal,  
 Ephlal ne hagadili Obed,  
<sup>38</sup> Obed ne hagadili Jehu,  
 Jehu ne hagadili Azariah,  
<sup>39</sup> Azariah ne hagadili Helez,  
 Helez ne hagadili Eleasah,  
<sup>40</sup> Eleasah ne hagadili Sismai,  
 Sismai ne hagadili Shallum,  
<sup>41</sup> Shallum ne hagadili Jekamiah,  
 gai Jekamiah ne hagadili Elishama.

*Hagadiilinga o Caleb*

- <sup>42</sup> Hagadiilinga o Caleb, taina daane o Jerahmeel: Mareshah, dana dama daane madua, go tamana o Ziph, ma dana dama go Mareshah, § go tamana o Hebron.
- <sup>43</sup> Hagadiilinga a Hebron: go Korah, ma Tapuah, ma Rekem, aama Shema.
- <sup>44</sup> Shema ne hagadili Raham, ne hagadili ina laa Jorkeam, gai Rekem ne hagadili Shammai.
- <sup>45</sup> Tama daane a Shammai go Maon; gai Maon ne hagadili Beth Zur.
- <sup>46</sup> Gai Ephah, de bodu laa daha o Caleb, ne haanau Haran, ma Moza, aama Gazez. Haran ne hagadili Gazez.
- <sup>47</sup> Dama daane a Jahdai: go Regem, ma Jotham, ma Gesham, ma Pelet, ma Ephah, aama Shaaph.
- <sup>48</sup> Gai Maacah, de bodu laa daha o Caleb, ne haanau Sheber aama Tirhanah.

---

§ 2:42 Muna Hebrew i kinei e dee iloo danuaa dono hagadoonunga.

49 Go ia hogi ne hanaua Shaaph, tamana o Madmannah, ma Sheva, tamana o Macbenah ma Gibe. Gai tamaa hine a Caleb go Acsah.

50 Aanei hagadiilinga o Caleb.

Dama daane a Hur, tama madua a Ephrathah: go Shobal, tamana o de gau Kiriath Jearim,

51 ma Salma, tamana o de gau Bethlehem, aama Hareph, tamana o de gau Beth Gader.

52 Gai hagadiilinga o Shobal, tamana o de gau Kiriath Jearim: go Haroeh, ma dahi luu baasi o de gau Menuhoth,

53 ma denga hagadiilinga o de gau Kiriath Jearim: go de gau Jether, ma de gau Puth, ma de gau Shumah, aama de gau Mishra, go dubuna o de gau Zorah ma de gau Eshtaol.

54 De aamuli o Salma: go de gau Bethlehem, ma de gau Netophah, ma de gau Atroth Beth Joab, ma dahi luu baasi o de gau Manahath, go de gau Zor.

55 Gai hagadiilinga o de gau sisi e nnoho laa i Jabez: go de gau Tirath, ma de gau Shimeah, aama de gau Suchah. Aanei hagadiilinga o de gau Ken, taane Hammath, go tamana o de huaabodu o Recab.

### 3

#### *Dama a David*

1 Aanei dama daane a David ne hagadili i Hebron: dana dama madua go Amnon, dono dinana go Ahinoam o Jezreel; togolua go Daniel, dono dinana go Abigail o Carmel;

<sup>2</sup> togodolu go Absalom, dono dinana go Maacah,  
 tamaa hine a Talmai, de hodoologi o Geshur;  
 togohaa go Adonijah, dono dinana go Haggith;  
<sup>3</sup> togolima go Shephatiah, dono dinana go  
 Abital;  
 togoono go Ithream, ange gi dono bodu go  
 Eglah.

<sup>4</sup> E dogoono dama a David ne hagdili i Hebron,  
 i de masavaa oona ne hodoologi ai i kilaa i e hidu  
 ngadau ma e ono malama. Gai ia ne hodoologi i  
 Jerusalem i e matolu ma dolu ngadau.\*

<sup>5</sup> Aanei dama a David ne hagdili i Jerusalem:  
 go Shimea,\* ma Shobab, ma Nathan, aama  
 Solomon. Gilaadeu dogohaa nei go dama a  
 Bathsheba, tamaa hine a Ammiel.\*

<sup>6</sup> Gai e dogosiva ange ana dama daane: go Ibhar,  
 ma Elishama, ma Eliphelet,

<sup>7</sup> ma Nogah, ma Nepheg, ma Japhia,

<sup>8</sup> Elishama, ma Eliada, aama Eliphelet.

<sup>9</sup> Aanei dama daane alodahi a David ange gi  
 ono bodu donu, gai e hanu hogi ana dama ange gi  
 ono bodu laa daha. Gai delaadeu daina hahine go  
 Tamar.

### *Denga hodoologi o Judah*

<sup>10</sup> Rehoboam go tama daane a Solomon,

tama daane a Solomon go Abijah,

tama daane a Abijah go Asa,

tama daane a Asa go Jehoshaphat,

<sup>11</sup> tama daane a Jehoshaphat go Jehoram,

tama daane a Jehoram go Ahaziah,

\* **3:4** 2 Sa 5.4-5; 1 Ki 2.11; 1 Ch 29.27

\* **3:5** Shimea, aabe go

Shammua. \* **3:5** 2 Sa 11.3

- tama daane a Ahaziah go Joash,  
<sup>12</sup> tama daane a Joash go Amaziah,  
 tama daane a Amaziah go Azariah,  
 tama daane a Azariah go Jotham,  
<sup>13</sup> tama daane a Jotham go Ahaz,  
 tama daane a Ahaz go Hezekiah,  
 tama daane a Hezekiah go Manasseh,  
<sup>14</sup> tama daane a Manasseh go Amon,  
 tama daane a Amon go Josiah.  
<sup>15</sup> Dama daane a Josiah: go Johanan, dana dama  
 madua, togolua go Jehoiakim, togodolu go  
 Zedekiah, gai togohaa go Shallum.  
<sup>16</sup> Hagadiilinga o Jehoiakim: tama daane a  
 Jehoiakim go Jehoiachin,<sup>†</sup> tama daane a Je-  
 hoiachin go Zedekiah;  
<sup>17</sup> Hagadiilinga o Jehoiachin, go taane ne gaavee  
 gi dahi henua gee: dana dama daane go  
 Shealtiel,  
<sup>18</sup> ma Malkiram, ma Pedaiah, ma Shenazzar, ma  
 Jekamiah, ma Hoshama, aama Nedabiah.  
<sup>19</sup> Dama daane a Pedaiah: go Zerubbabel ma  
 Shimei.  
 Dama daane a Zerubbabel: go Meshullam, ma  
 Hananiah, aama delaaau daina hahine go Sh-  
 elomith.  
<sup>20</sup> E dogolima ange ana dama: go Hashubah, ma  
 Ohel, ma Berekiah, ma Hasadiah, aama Jushab-  
 Hese.  
<sup>21</sup> Dama a Hananiah: go Pelatiah ma Jeshaiiah;  
 tama daane a Jeshaiiah go Rephaiah, tama  
 daane a Rephaiah go Arnan, tama daane a

---

<sup>†</sup> **3:16** *Jehoiachin: de Beebaa Hebrew go Jeconiah.*

Arnan go Obadiah, gai tama daane a Obadiah go Shecaniah.

<sup>22</sup> Hagadiilinga o Shecaniah: dana dama daane go Shemaiah, dama daane a Shemaiah go Hattush, ma Igal, ma Bariah, ma Neariah, aama Shaphat, e dogoono gilaadeu.

<sup>23</sup> Dama daane a Neariah: go Elioenai, ma Hizkiah, aama Azrikam, e dogodolu gilaadeu.

<sup>24</sup> Dama daane a Elioenai: go Hodaviah, ma Eliashib, ma Pelaiah, ma Akkub, ma Johanan, ma Delaiah, aama Anani, se dogohidu gilaadeu.

## 4

### *De aamuli o Judah*

<sup>1</sup> Denga daane de aamuli o Judah: go Perez, ma Hezron, ma Carmi, ma Hur, aama Shobal.

<sup>2</sup> Reaiah, go tama daane a Shobal, ne hagdili Jahath, gai Jahath ne hagdili Ahumai ma Lahad. Aanei hagdilinga o dangada o Zorah.

<sup>3</sup> Gai aanei dama daane a Etam: go Jezreel, ma Ishma, aama Idbash; de ingoo o delaadeu daina hahine go Hazzelelponi.

<sup>4</sup> Penuel ne hagdili Gedor, gai Ezer ne hagdili Hushah. Aanei hagdilinga o Hur, tama madua a Ephrathah, tubuna madagidagi o de gau Bethlehem.

<sup>5</sup> Ashhur, ne hagdualia laa Tekoa, e dogolua ono bodu, dahi go Helah, gai dahi go Naarah.

<sup>6</sup> Naarah ne haanau Ahuzzam, ma Hopher, ma Temeni, aama Haahashtari. Aanei dama daane a Naarah.

<sup>7</sup> Dama daane a Helah go Zereth, ma Izhar, aama Ethnan.

<sup>8</sup> Koz ne hagdili Anub, ma Zobebah, aama de hagdilinga o Aharhel, tama daane a Harum.

<sup>9</sup> Jabez e kii ange dono hagdubulia i ono daina daane ange laa. Dono dinana ne hagingoo ange ia go Jabez,\* i hiidinga ia ne hagdaba, “Au ne mmae i de masavaa aagu ne haanau ai ia.”

<sup>10</sup> Gai Jabez ne dalodalo ange gi de Maadua o Israel, ga hai ange, “De Maadua, gaamai gi de au de manuuia ma de hai gi laumalie dogu mommee. Gai koe noho i ogu daha ma de buibui au i denga hai ngadaa alodahi, gi dee hagammae ina ai au.” Gai de Maadua ne hai ga bei dono mee ne dangidangi ai.

<sup>11</sup> Kelub, taina daane o Shuhah, ne hagdili Mehir, gai Mehir ne hagdili Eshton.

<sup>12</sup> Eshton ne hagdili Beth Rapha, ma Paseah, aama Tehinnah, go taane ne hagdauulia de aduhale go Nahash. Aanei dubuna madagidagi o dangada i Recah.

<sup>13</sup> Dama daane a Kenaz: go Othniel ma Seraiah. Dama daane a Othniel go Hathath ma Meonothai.†

<sup>14</sup> Meonothai ne hagdili Ophrah, gai Seraiah ne hagdili Joab, tamana o Ge Harashim.‡ Gai ne hagingoo ange go Ge Harashim, i hiidinga dangada e nnoho ai ni dangada labagau.

---

\* **4:9** *Jabez* e dagu bei de muna Hebrew go *demmae*. † **4:13** Hanu beebaa duai e dee dagodo ai de ingoo go *Meonothai*. ‡ **4:14** *Ge Harashim* i muna Hebrew e bei go *de geelonga o denga labagau*.

- 15 Dama daane a Caleb, tama daane a Jephunneh: go Iru, ma Elah, aama Naam. Tama daane a Elah go Kenaz.
- 16 Dama daane a Jehallelel: go Ziph, ma Ziphah, ma Tiria, aama Asarel.
- 17-18 Dama daane a Ezrah: go Jether, ma Mered, ma Ephraim, aama Jalon. Gai aanei dama a Bithia, tamaa hine a Pharaoh a Mered ne hai bodu ange laa aagena. Ia ne haanau Miriam, ma Shammai, aama Ishbah, tamana o Eshtemoa. Gai dono bodu mai i Judah ne haanau Jered, tamana o Gedor, ma Heber, tamana o Soco, ma Jekuthiel, tamana o Zanoah.
- 19 Dama daane a de bodu o Hodiah, taina hahine o Naham: go tamana o de gau Gerem e nnoho laa i Keilah, ma de gau Maacah e nnoho laa i Eshtemoa.
- 20 Dama daane a Shimon: go Amnon, ma Rinah, ma Ben-Hanan, aama Tilon.  
Dama daane a Ishi: go Zoheth, ma Ben-Zoheth.
- 21 Dama daane a Shelah, tama daane a Judah: go Er, tamana o Lecah, ma Laadah, tamana o Mareshah, ma denga huaabodu e haia laa denga *linen* i Beth Ashbea,
- 22 ma Jokim, ma denga daane o Cozeba, ma Joash, ma Saraph, ne dagina laa Moab, ma Jashubi Lehem. (Mee nei ni mee ne daohi mai madagidagi.)
- 23 Aanei gilaadeu e haia denga gumedi hadu, ma de nnoho i Netaim ma Gederah; gilaadeu ne nnoho i kilaa ma e hai ai hegau a de hodoologi.

*De aamuli o Simeon*

- <sup>24</sup> Hagadiilinga o Simeon: go Nemuel, ma Jamin, ma Jarib, ma Zerah, aama Shaul.
- <sup>25</sup> Shaul ne hagadili Shallum, ne hagadili ina laa Mibsam, ne hagadili ina laa Mishma.
- <sup>26</sup> Hagadiilinga o Mishma: go Hammuel, ne hagadili ina laa Zaccur, gai Zaccur ne hagadili Shimei.
- <sup>27</sup> Gai Shimei e dinoangahulu ma dogoono ana dama daane ma e dogoono damaa hine; gai ono daina ange laa tee soa loo alaadeu dama. Gai olaadeu hagadiilinga tee soa bei dangada o Judah.
- <sup>28</sup> Gilaadeu ne nnoho i Beersheba, ma Moladah, ma Hazar Shual,\*
- <sup>29</sup> ma Bilhah, ma Ezem, ma Tolad,
- <sup>30</sup> ma Bethuel, ma Hormah, ma Ziklag,
- <sup>31</sup> ma Beth Marcaboth, ma Hazar Susim, ma Beth Biri, aama Shaaraim. Aanei olaadeu aduhale ga dae ai gi de masavaa o David ne hodooligi ai.
- <sup>32</sup> Gai olaadeu aduhale vaaligiligi go Etam, ma Ain, ma Rimmon, ma Token, aama Ashan, e lima aduhale nei.
- <sup>33</sup> Niiolaadeu hogi denga aduhale vaaligiligi i gaogao denga aduhale laa, delaadeu mommee e hano ga dae gi Baal. Aanei mommee olaadeu ne nnoho ai, gai gilaadeu ne daohi ingoo o olaadeu mommee ma olaadeu huaabodu.
- <sup>34</sup> Meshobab, ma Jamlek, ma Joshah, tama daane a Amaziah,
- <sup>35</sup> ma Joel, ma Jehu, tama daane a Joshibiah, tama daane a Seraiah, tama daane a Asiel,
- <sup>36</sup> ma Elioenai, ma Jaakobah, ma Jeshohaiah, ma Asaiah, ma Adiel, ma Jesimiel, ma Benaiah,

---

\* **4:28** Josh 19.2-8

<sup>37</sup> ma Ziza, tama daane a Shiphi, tama daane a Allon, tama daane a Jedaiah, tama daane a Shimri, tama daane a Shemaiah;

<sup>38</sup> denga daane ne sisi nei olaadeu ingoo ni dagi i olaadeu hagadiilinga. Gai gilaadeu ne hagadili ga soa mmao.

<sup>39</sup> Gilaadeu ne hulo gi de mommee i gaogao Gedor, i de baasi i dua de geelonga i kilaa, e ssala ai dahi mommee iai helii e haangai ai alaadeu hagabuulingaa ssiibi.

<sup>40</sup> Gilaadeu ne gidee dahi gelegele danuaa iai helii e haangai ai manu, gai se henua laumalie, gai e nnoho paba ai dangada ma tee hagalongaa. I mua gai hanu dangada de aamuli o Ham nogo nnoho i kilaa.

<sup>41</sup> Gai dangada gu sisi olaadeu ingoo ne loomai i de masavaa o Hezekiah, de hodooligi o Judah. Gilaadeu ne daa ga odi i de maakau de aamuli o Ham, ma de aamuli o Meun nogo nnoho laa i kilaa, bei de hai gu dagodo ai anailaa nei. Gai gilaadeu ga nnoho i delaadeu mommee, go hiidinga se mommee iai helii e haangai ai alaadeu manu.

<sup>42</sup> Gai ne limalau dangada mai i de aamuli o Simeon ne dagina e Pelatiah, ma Neariah, ma Rephaiah, aama Uzziel, go dama daane a Ishi, ga hulo ai ga kave de mounga go Seir.

<sup>43</sup> Gai gilaadeu ne daa ga maakau de gau Amalek ne saavini laa ga hulo, gai gilaadeu ga nnoho i kilaa ga dae mai ai gi anailaa nei.

## 5

### *De aamuli o Reuben*

<sup>1</sup> Dama daane a Reuben, tama madua a Israel. (Go ia tama madua, aagai ia ne dagodo haisala madali de bodu o dono damana, gai de boolonga o tama madua gu gaavange ai loo gi luu dama daane a Joseph, tama daane a Israel. Gai ia tee sisi dono ingoo i tuulanga o tama madua e gaavee laa de boolonga,\*)

<sup>2</sup> aagai de aamuli o Judah ne mmahi ange i ono daina ange laa, gai dahi dagi ne sula age i daho ono hagadiilinga, aagai de boolonga o tama madua ne gaavange gi Joseph.)\*

<sup>3</sup> Dama daane a Reuben, tama madua a Israel: go Hanok, ma Pallu, ma Hezron, aama Carmi.

<sup>4</sup> Denga hagadiilinga o Joel: Joel ne hagadili Shemaiah, Shemaiah ne hagadili Gog, Gog ne hagadili Shimei,

<sup>5</sup> Shimei ne hagadili Micah, Micah ne hagadili Reaiah, Reaiah ne hagadili Baal,

<sup>6</sup> Baal ne hagadili Beerah, go taane a Tiglath-Pileser, de hodoologi o Assyria ne kave gee laa i de henua. Ia go dahi dagi o de aamuli o Reuben.\*

<sup>7</sup> Gai dangada i denga hagadiilinga ne daohi olaadeu ingoo i de masavaa ne sisi ai olaadeu atangada: go Jeiel, ma Zechariah,

<sup>8</sup> ma Bela tama daane a Azaz, tama daane a Shema, tama daane a Joel. Gilaadeu ne noho i de mommee go Aroer ga hano ai ga dae gi Nebo ma Baal Meon.

<sup>9</sup> Gilaadeu ne nnoho hogi i baasi i dua i de mommee e daamada ai de vao i baasi dai o Euphrates,

---

\* 5:1 Gen 35.22; 49.3-4      \* 5:2 Gen 49.8-10      \* 5:6 2 Ki 15.29

go hiidinga alaadeu manu haangai gu hagadili ma gu lagolago mmao i de henua go Gilead.

<sup>10</sup> De masavaa o Saul, gai gilaadeu ne hebagi ange gi de gau Hagar, ga hagadee kii gilaadeu; gai gilaadeu ga kave mommee alodahi o de gau Hagar i baasi dua o Gilead ga nnoho ai.

### *De aamuli o Gad*

<sup>11</sup> De aamuli o Gad ne nnoho i olaadeu gaogao i de henua go Bashan, gai delaadeu mommee e hano ga dae gi Salecah.

<sup>12</sup> Joel go tagi i Bashan, Shapham go togolua, ga lava go Janai ma Shaphat.

<sup>13</sup> Gai olaadeu dangada i denga huaabodu ange laa: go Michael, ma Meshullam, ma Sheba, ma Jorai, ma Jacan, ma Zia, aama Eber, se dogohidu gilaadeu.

<sup>14</sup> Aanei dama daane a Abihail, tama daane a Huri, tama daane a Jaroah, tama daane a Gilead, tama daane a Michael, tama daane a Jeshishai, tama daane a Jahdo, tama daane a Buz.

<sup>15</sup> Ahi tama daane a Abdiel, tama daane a Guni, go tagi o denga hagadiilinga nei.

<sup>16</sup> Gilaadeu ne nnoho i Gilead, ma Bashan ma ono aduhale vaaliligili, ma mommee alodahi iai helii i Sharon, aanei ngaadonga o delaadeu mommee.

<sup>17</sup> De gau nei alodahi ne sisi olaadeu ingoo madali dangada i olaadeu aamuli, i de masavaa o Jotham ne hodooligi ai i Judah, aama de masavaa o Jeroboam ne hodooligi ai i Israel.

18 De aamuli o Reuben, ma de aamuli o Gad, aama dahi luu baasi de aamuli o Manasseh se 44,760 olaadeu daane gu paba ange gi de hebagi. Gilaadeu e hagauda denga mee hungihungi ma gadilaasa, gai e mmau i tili denga mee hholu, gai ni daane gu agoago ange gi de hebagi.

19 Gilaadeu ne hebagi ange gi de gau Hagar, ma Jetur, ma Naphish, aama Nodab.

20 Gai gilaadeu ne kave dahi bale ga hagadee kii de gau Hagar, ma henua alodahi ne hagabuni ange laa gi Hagar, go hiidinga gilaadeu ne dalodalo ange gi de Maadua i de masavaa o de hebagi, gai ia ne basa ange gi delaadeu dangidangi, i hiidinga gilaadeu ne hagadonu ia.

21 Gai gilaadeu ga kave manu haangai ma dangada ga hulo ai: e limasemada gamelo, ma e 250,000 ssiibi, ma e luamano *donkey*, aama e dahiseguli dangada.

22 Gai ne soa dangada ne maakau, go hiidinga de hebagi laa se hagatau mai i daho de Maadua. Gai gilaadeu ne nnoho i olaadeu mommee ga dae ai gi de noonoodia o dangada ga gaavee gee mai i de henua.

### *Dahi luu baasi de aamuli o Manasseh*

23 Gai dangada i dahi luu baasi de aamuli o Manasseh e soa mmao; gilaadeu ne nnoho mai loo i Bashan ga hano ai gi Baal Hermon, e bei go Senir (go de mounga go Hermon).

24 Gai aanei dagi o denga huaabodu i de aamuli laa: go Epher, ma Ishi, ma Eliel, ma Azriel, ma Jeremiah, ma Hodaviah, aama Jahdiel. Gilaadeu ni daane mmahi ma de dau i de hebagi, gai ni dagi i aamuli o olaadeu dubuna madagidagi.

<sup>25</sup> Aagai gilaadeu tee hai hegau i de mee abodonu ange gi de Maadua o olaadeu dubuna madagidagi, gai ne daumaha ange gi diinonga o dangada nogo nnoho i de henua i mua, go dangada a de Maadua ne daa ga maakau.

<sup>26</sup> Gai de Maadua o Israel ne hagangalue lodo o de hodooligi o Assyria go Pul (e bei go Tiglath-Pileser, de hodooligi o Assyria), gi gaavee gee de aamuli o Reuben, ma de aamuli o Gad, aama dahi luu baasi de aamuli o Manasseh gi dahi henua gee. Gai ia ne kave gilaadeu gi nnoho i Halah, ma Habor, ma Hara, aama gaogao ssaalingaa vai go Gozan, gai gilaadeu goi nnoho donu huu i kilaa ga dae mai ai gi anailaa nei.\*

## 6

### *De aamuli o Levi*

- <sup>1</sup> Dama daane a Levi: go Gershon, ma Kohath, aama Merari.
- <sup>2</sup> Dama daane a Kohath: go Amram, ma Izhar, ma Hebron, aama Uzziel.
- <sup>3</sup> Dama a Amram: go Aaron, ma Moses, aama Miriam.  
Dama daane a Aaron: go Nadab, ma Abihu, ma Eleazar, aama Ithamar.
- <sup>4</sup> Eleazar ne hagadili Phinehas,  
Phinehas ne hagadili Abishua,
- <sup>5</sup> Abishua ne hagadili Bukki,  
Bukki ne hagadili Uzzi,
- <sup>6</sup> Uzzi ne hagadili Zeremiah,  
Zeremiah ne hagadili Meraioth,
- <sup>7</sup> Meraioth ne hagadili Amariah,

---

\* 5:26 2 Ki 15.19, 29; 17.6

- Amariah ne hagadili Ahitub,  
 8 Ahitub ne hagadili Zadok,  
 Zadok ne hagadili Ahimaaz,  
 9 Ahimaaz ne hagadili Azariah,  
 Azariah ne hagadili Johanan,  
 10 gai Johanan ne hagadili Azariah (go taane ne haia hegau a tangada haimeedabu i de *temple* a Solomon ne hagaduu laa i Jerusalem).  
 11 Azariah ne hagadili Amariah,  
 Amariah ne hagadili Ahitub,  
 12 Ahitub ne hagadili Zadok,  
 Zadok ne hagadili Shallum,  
 13 Shallum ne hagadili Hilkiah,  
 Hilkiah ne hagadili Azariah,  
 14 Azariah ne hagadili Seraiah,  
 Seraiah ne hagadili Jehozadak.  
 15 Gai Jehozadak ne noodia ga gaavee gee i de masavaa a TAGI MAOLUNGA ne dugu ange ai Nebuchadnezzar gi noonoodia dangada i Judah ma Jerusalem gi gaavee gee i de henua.
- 16 Dama daane a Levi: go Gershom,\* ma Kohath, aama Merari.\*  
 17 Dama daane a Gershom: go Libni, ma Shimei.  
 18 Dama daane a Kohath: go Amram, ma Izhar, ma Hebron, aama Uzziel.  
 19 Dama daane a Merari: go Mahli ma Mushi. Aanei hagadiilinga o Levi ne sisi mai i olaadeu dubuna madagidagi.  
 20 Dama daane a Gershom: dana dama go Libni, dana dama go Jahath, dana dama go Zimmah,

---

\* **6:16** *Gershom*, aabe go *Gershon*.      \* **6:16** Exo 6.16-19

<sup>21</sup> dana dama go Joah, dana dama go Iddo, dana dama go Zerah, dana dama go Jeatherai.

<sup>22</sup> Hagadiilinga o Kohath: dana dama go Amminadab, dana dama go Korah, dana dama go Assir,

<sup>23</sup> dana dama go Elkanah, dana dama go Ebiasaph, dana dama go Assir,

<sup>24</sup> dana dama go Tahath, dana dama go Uriel, dana dama go Uzziah, dana dama go Shaul.

<sup>25</sup> Hagadiilinga o Elkanah: go Amasai, ma Ahimoth,

<sup>26</sup> dana dama go Elkanah, dana dama go Zophai, dana dama go Nahath,

<sup>27</sup> dana dama go Eliab, dana dama go Jeroham, dana dama go Elkanah, dana dama go Samuel.

<sup>28</sup> Dama daane a Samuel: tama daane madua go Joel, gai tama gauligi go Abijah.

<sup>29</sup> Dama daane a Merari: go Mahli, dana dama go Libni, dana dama go Shimei, dana dama go Uzzah,

<sup>30</sup> dana dama go Shimea, dana dama go Hagiah, dana dama go Asaiah.

### *De gau daahili o de temple*

<sup>31</sup> Aanei denga daane a David ne hili gi dagina denga daahili i de hale o TAGI MAOLUNGA, i dua de dae mai o de ngavesi o de hagatoo donu hagaheloongi gi kilaa.

<sup>32</sup> Gai gilaadeu ne hua denga daahili i gaogao de *tabernacle*, go de hale malo hagabuni, ga dae ai gi de masavaa a Solomon ne hagaduu age ai de hale o TAGI MAOLUNGA i Jerusalem. Gai gilaadeu

ne hagatau de masavaa o dahi ma dahi e hai hegau ai.

<sup>33</sup> Aanei denga daane ma alaadeu dama ne haia hegau:

mai i hagadiilinga o Kohath: tangada daahili go Heman, tama daane a Joel, tama daane a Samuel,

<sup>34</sup> tama daane a Elkanah, tama daane a Jeroham, tama daane a Eliel, tama daane a Toah,

<sup>35</sup> tama daane a Zuph, tama daane a Elkanah, tama daane a Mahath, tama daane a Amasai,

<sup>36</sup> tama daane a Elkanah, tama daane a Joel, tama daane a Azariah, tama daane a Zephaniah,

<sup>37</sup> tama daane a Tahath, tama daane a Assir, tama daane a Ebiasaph, tama daane a Korah,

<sup>38</sup> tama daane a Izhar, tama daane a Kohath, tama daane a Levi, tama daane a Israel;

<sup>39</sup> ma dono daina daane go Asaph, go taane e duu i dono madau: go Asaph, tama daane a Berekiah, tama daane a Shimea,

<sup>40</sup> tama daane a Michael, tama daane a Baaseiah, tama daane a Malkijah,

<sup>41</sup> tama daane a Ethni, tama daane a Zerah, tama daane a Adaijah,

<sup>42</sup> tama daane a Ethan, tama daane a Zimmah, tama daane a Shimei,

<sup>43</sup> tama daane a Jahath, tama daane a Gershon, tama daane a Levi.

<sup>44</sup> Gai mai i olaadeu daina i de hagadiilinga o Merari, go gilaadeu e tuu i dono masui: go Ethan, tama daane a Kishi, tama daane a Abdi, tama daane a Malluk,

<sup>45</sup> tama daane a Hashabiah, tama daane a Amaziah, tama daane a Hilkiyah,

<sup>46</sup> tama daane a Amzi, tama daane a Bani, tama daane a Shemer,

<sup>47</sup> tama daane a Mahli, tama daane a Mushi, tama daane a Merari, tama daane a Levi.

<sup>48</sup> Gai hanu hagadiilinga o Levi ne hili gi haia hegau alodahi o de *tabernacle*, go de hale o de Maadua.

### *Hagadiilinga o Aaron*

<sup>49</sup> Aagai go Aaron ma ana dama daane ne haia denga sigidaumaha i hongga de mommee o ssigidaumaha dudu, ma de mommee o ssigidaumaha o mee maanongi ma mee alodahi e hai i de Aabi Dabu mmao, e hagao ai haisala o Israel, bei dagodo mee alodahi a Moses, tangada hai hegau o de Maadua gu tala ange ai.

<sup>50</sup> Aanei hagadiilinga o Aaron: dana dama daane go Eleazar, dana dama go Phinehas, dana dama go Abishua,

<sup>51</sup> dana dama go Bukki, dana dama go Uzzi, dana dama go Zerariah,

<sup>52</sup> dana dama go Meraioth, dana dama go Amariah, dana dama go Ahitub,

<sup>53</sup> dana dama go Zadok, dana dama go Ahimaaz.

### *Mommee o de aamuli o Levi*

<sup>54</sup> Aanei mommee olaadeu ne nnoho ai i lodo olaadeu vaaenga ange (mommee nei ne vvae ange gi de hagadiilinga o Kohath mai i de aamuli o Aaron, i hiidinga go gilaadeu ne daangia tahi mommee):

<sup>55</sup> Go Hebron, mai i de vaaenga o Judah ma mommee iai helii i luu baasi.

<sup>56</sup> Aagai denga veelenga ma aduhale vaaligiligi i luu baasi de aduhale ne gaavange gi Caleb, tama daane a Jephunneh.

<sup>57</sup> Gai ne gaavange gi de aamuli o Aaron denga aduhale hagaola: go Hebron, ma Libnah, ma Jattir, ma Eshtemoa,

<sup>58</sup> ma Hilen ma Debir,

<sup>59</sup> ma Ashan, ma Beth Shemesh ma olaadeu mommee iai helii.

<sup>60</sup> Gai mommee ne gaavange gi gilaadeu i de vaaenga o Benjamin: go Gibeon, ma Geba, ma Alemeth, aama Anathoth ma mommee iai helii i kilaa. Gai aduhale alodahi ne gaavange gi olaadeu hagadiilinga se madaangahulu ma dolu.

<sup>61</sup> Gai denga hagadiilinga o Kohath ange laa ne vvae ange e madaangahulu aduhale mai i de vaaenga o dahi luu baasi de aamuli o Manasseh.

<sup>62</sup> Gai denga hagadiilinga o de aamuli o Gershon ne kave e madaangahulu ma dolu aduhale mai i de vaaenga o Issachar, ma Asher, ma Naphtali, aama mai i daho dahi luu baasi de aamuli o Manasseh i Bashan.

<sup>63</sup> Gai denga hagadiilinga i de aamuli o Merari ne kave e madaangahulu ma lua aduhale mai i de vaaenga o Reuben, ma Gad, aama Zebulun.

<sup>64</sup> Gai de gau Israel ne vvae ange gi de aamuli o Levi denga aduhale laa ma mommee iai helii i kilaa.

<sup>65</sup> Gai gilaadeu ne kave denga aduhale gu dau laa olaadeu ingoo i de vaaenga o Judah, ma Simeon, aama Benjamin.

<sup>66</sup> Gai hanu huaabodu mai i de aamuli o Kohath ne dada hanu aduhale mai i de vaaenga o Ephraim.

<sup>67</sup> Gai ne gaavange gi gilaadeu denga aduhale hagaola: go Shechem i de mommee iai mounga o Ephraim, ma Gezer,

<sup>68</sup> ma Jokmeam, ma Beth Horon,

<sup>69</sup> ma Aijalon, ma Gath Rimmon ma denga mommee iai helii i kilaa.

<sup>70</sup> Gai denga hagadiilinga e doe i de aamuli o Kohath ne kave mai i daho dahi luu baasi de aamuli o Manasseh ange laa, Aner ma Bileam ma olaau mommee iai helii.

<sup>71</sup> Gai de hagadiilinga o Gershon ne kave denga aduhale nei:

mai i daho dahi luu baasi de aamuli o Manasseh: go Golan i Bashan ma Ashtaroth ma mommee iai helii i kilaa;

<sup>72</sup> gai mai i de vaaenga o Issachar: go Kedesh, ma Daberath,

<sup>73</sup> ma Ramoth ma Anem madali mommee iai helii i kilaa;

<sup>74</sup> gai mai i de vaaenga o Asher: go Mashal ma Abdon,

<sup>75</sup> ma Hukok ma Rehob madali mommee iai helii i kilaa;

<sup>76</sup> gai mai i de vaaenga o Naphtali: go Kedesh i Galilee ma Hammon, ma Kiriathaim madali mommee iai helii i kilaa.

<sup>77</sup> Gai de hagadiilinga o Merari (go dangada e doe i de aamuli o Levi) ne kave denga aduhale nei:

mai i de vaaenga o Zebulun: go Jokneam, ma Kartah, ma Rimmono ma Tabor madali mommee iai helii i kilaa;

<sup>78</sup> gai mai i de vaaenga o Reuben i de baasi laa o Jordan, i baasi dua o Jericho, go Bezer i de

vao, ma Jahzah,  
<sup>79</sup> ma Kedemoth ma Mephaath madali mommee  
 iai helii i kilaa;  
<sup>80</sup> gai mai i de vaaenga o Gad: go Ramoth i Gilead  
 ma Mahanaim,  
<sup>81</sup> ma Heshbon ma Jazer madali mommee iai  
 helii i kilaa.

## 7

### *De aamuli o Issachar*

<sup>1</sup> Dama daane a Issachar: go Tola, ma Puah, ma Jashub, aama Shimron, e dogohaa gilaadeu.

<sup>2</sup> Dama daane a Tola: go Uzzi, ma Rephaiah, ma Jeriel, ma Jahmai, ma Ibsam, aama Shemuel; gilaadeu ni dagi i denga huaabodu o Tola. Gai de masavaa o David e hodooligi ai, gai denga daane o Tola ni daane dau i de hebagi i de laadeu atangada, gilaadeu alodahi se 22,600.

<sup>3</sup> Tama daane a Uzzi: go Izrahiah.

Dama daane a Izrahiah: go Michael, ma Obadiah, ma Joel, aama Isshiah. Gilaadeu dogolima nei ni dagi.

<sup>4</sup> Gai denga atangada alodahi ne daohi se 36,000 daane e paba ange gi de hebagi, gai e soa olaadeu bodu ma alaadeu dama.

<sup>5</sup> Gai denga daane hebagi alodahi i denga hagiilinga o de aamuli o Issachar, ne sisi olaadeu atangada se 87,000.

### *De aamuli o Benjamin*

<sup>6</sup> Dama daane a Benjamin: go Bela, ma Beker, aama Jediah, se dogodolu gilaadeu.

<sup>7</sup> Dama daane a Bela: go Ezbon, ma Uzzi, ma Uzziel, ma Jerimoth, aama Iri; gilaadeu ni

dagi i olaadeu huaabodu, gai se dogolima gilaadeu. Gai se 22,034 daane hebagi ne sisi olaadeu ingoo i olaadeu atangada.

<sup>8</sup> Dama daane a Beker: go Zemirah, ma Joash, ma Eliezer, ma Elioenai, ma Omri, ma Jeremoth, ma Abijah, ma Anathoth, aama Alemeth. Aanei alodahi dama daane a Beker.

<sup>9</sup> Gai ne sisi i olaadeu atangada bolo gilaadeu ni dagi i olaadeu huaabodu, gai se 20,200 daane hebagi.

<sup>10</sup> Tama daane a Jediael: go Bilhan.

Dama daane a Bilhan: go Jeush, ma Benjamin, ma Ehud, ma Kenaanah, ma Zethan, ma Tarshish, aama Ahishahar.

<sup>11</sup> Denga daane nei alodahi ni dama nii Jediael gai ni dagi i olaadeu huaabodu. Gai se 17,200 daane hebagi gu paba ange gi de hebagi.

<sup>12</sup> Shuppmim ma Huppmim ni dama daane nii Ir, gai Hushim se dama daane nii Aher.

### *De aamuli o Naphtali*

<sup>13</sup> Dama daane a Naphtali: go Jahziel, ma Guni, ma Jezer, aama Shallum, go hagadiilinga o Bilhah.

### *De aamuli o Manasseh*

<sup>14</sup> Dama daane a Manasseh: go Asriel, tama a dono bodu laa daha mai i Syria. Gai ia ne haanau Makir, tamana o Gilead.

<sup>15</sup> Gai Makir ne hai bodu ange gi dahi hahine mai i de gau Huppmim ma Shuppmim. De ingoo o dono daina hahine go Maacah.

Gai togolua dama a Makir go Zelophehad, gai Zelophehad ni damaa hine donu huu aana.

- 16 Gai Maacah, de bodu o Makir, ne haanau dahi dama daane, ga hagaingoo ange ia go Peresh. Gai taina daane o Peresh go Sheresh, gai luaana dama daane go Ulam ma Rakem.
- 17 Tama daane a Ulam: go Bedan. Aanei dama daane a Gilead, tama daane a Makir, tama daane a Manasseh.
- 18 Gai dono daina hahine go Hammoleketh ne haanau Ishhod, ma Abiezer, aama Mahlah.
- 19 Dama daane a Shemida: go Ahian, ma Shechem, ma Likhi, aama Aniam.

### *De aamuli o Ephraim*

- 20 Gai aanei dama a Ephraim: dana dama go Shuthelah, dana dama go Bered, dana dama go Tahath, dana dama go Eleadah, dana dama go Tahath,
- 21 dana dama go Zabad, dana dama go Shuthelah. Gai Ezer ma Elead ne daia ga maakau i denga daane o Gath, i de masavaa alaau ne hulo ai e hai gi de mahi alaadeu manu haangai.
- 22 Gai delaau damana go Ephraim ne hinangalosaa i hanu langi lagolago, gai ono dangada ne loomai ga hagaaneane ia.
- 23 Dua mee laa gai Ephraim ne hagahebaa ma dono bodu, gai de hine laa gu hai dama, ga haanau dahi dama daane. Gai Ephraim ga hagaingoo ange ia go Beriah,\* go hiidinga de hai ngadaa gu hai ange laa gi dono huaabodu.
- 24 Gai dana damaa hine go Sheerah, go ia ne hagaduulia de mommee e mua gi lalo aama de

---

\* **7:23** *Beriah* e dagu bei de muna Hebrew go de *hai ngadaa*.

mommee e mua gi lunga i Beth Horon, aama Uzzen Sheerah.

<sup>25</sup> E dahi hogi ana dama go Rephah, dana dama go Resheph, dana dama go Telah, dana dama go Tahan,

<sup>26</sup> dana dama go Ladan, dana dama go Ammi-hud, dana dama go Elishama,

<sup>27</sup> dana dama go Nun, dana dama go Joshua.

<sup>28</sup> Gai olaadeu mommee aama olaadeu aduhale ne nnoho ai go Bethel ma aduhale vaaligiligi i luono baasi, ma Naaran i de baasi dua, ma Gezer ma ono aduhale vaaligiligi i de baasi gi dai, ma Shechem ma ono aduhale vaaligiligi ga hano ai laa ga dae gi Ayyah ma ono aduhale vaaligiligi.

<sup>29</sup> Gai de mommee e ngado mai ai de vaaenga o Manasseh: go Beth Shan, ma Taanak, ma Megiddo ma Dor aama olaadeu aduhale vaaligiligi, gai go hagadiilinga o Joseph, tama daane a Israel e nnoho ai.

### *De aamuli o Asher*

<sup>30</sup> Dama daane a Asher: go Imnah, ma Ishvah, ma Ishvi, ma Beriah. Gai delaadeu daina hahine go Serah.

<sup>31</sup> Dama daane a Beriah: go Heber ma Malkiel, ne hagadili ina laa Birzaith.

<sup>32</sup> Heber ne hagadili Japhlet, ma Shomer, ma Hotham, aama delaadeu daina hahine go Shua.

<sup>33</sup> Dama daane a Japhlet: go Pasak, ma Bimhal, aama Ashvath. Aanei dama daane a Japhlet.

<sup>34</sup> Dama daane a Shomer: go Ahi, ma Rohgah, ma Jehubbah, aama Aram.

- <sup>35</sup> Dama daane a dono daina daane go Helem: go Zophah, ma Imna, ma Shelesh, aama Amal.
- <sup>36</sup> Dama daane a Zophah: go Suah, ma Harnepher, ma Shual, ma Beri, ma Imrah,
- <sup>37</sup> ma Bezer, ma Hod, ma Shamma, ma Shilshah, ma Ithran, aama Beera.
- <sup>38</sup> Dama daane a Jether: go Jephunneh, ma Pispá, aama Ara.
- <sup>39</sup> Dama daane a Ulla: go Arah, ma Hanniel, aama Rizia.
- <sup>40</sup> Gilaadeu nei alodahi ni daane mai i de aamuli o Asher — gilaadeu ni dagi i olaadeu huaabodu, gai ni daane dau ma de mmahi i de hebagi. Gai taelodo o olaadeu daane gu paba ange gi de hebagi, gai gu sisi i olaadeu atangada se 26,000.

## 8

### *De atangada o Saul, taane de aamuli o Benjamin*

- <sup>1</sup> Benjamin ne hagdili Bela dana dama madua, togolua dama go Ashbel, togodolu go Aharah,
- <sup>2</sup> togohaa go Nohah, gai togolima go Rapha.
- <sup>3</sup> Gai dama daane a Bela: go Addar, ma Gera, ma Abihud,
- <sup>4</sup> ma Abishua, ma Naaman, ma Ahoah,
- <sup>5</sup> ma Gera, ma Shephuphan, aama Huram.
- <sup>6</sup> Aanei dama daane a Ehud (gilaadeu ni dagi niio denga huaabodu e nnoho i Geba, gai gilaadeu ne gaavee gi Manahath):
- <sup>7</sup> go Naaman, ma Ahijah, aama Gera, taane ne haia laa gilaadeu gi hulo gee mai i de henua; ia ne hagdili Uzza ma Ahihud.

- 8 Gai Shahraraim ne hagadili hanu dama i de henua go Moab, i dua dono maavae ange gi luoono bodu go Hushim ma Baara.
- 9 Gai ia ne hagadili hoga hanu dama i daho dono bodu go Hodesh: go Jobab, ma Zibia, ma Mesha, ma Malcam,
- 10 ma Jeuz, ma Sakia, aama Mirmah. Aanei ana dama daane, gai ni daga niio denga huaabodu.
- 11 Ia ne hagadili hoga hanu dama i daho Hushim: go Abitub ma Elpaal.
- 12 Dama daane a Elpaal: go Eber, ma Misham, ma Shemed (go taane ne hagaduulia Ono ma Lod ma ono aduhale vaaligiligi),
- 13 ma Beriah ma Shema; gilaa ni daga i denga huaabodu e nnoho laa i Aijalon, gai go gilaa ne hai gi hulo gee dangada nogo nnoho i Gath.
- 14 Gai Ahio, ma Shashak, ma Jeremoth,
- 15 ma Zebadiah, ma Arad, ma Eder,
- 16 ma Michael, ma Ishpah, aama Joha go dama daane a Beriah.
- 17 Gai Zebadiah, ma Meshullam, ma Hizki, ma Heber,
- 18 ma Ishmerai, ma Izliah, aama Jobab go dama daane a Elpaal.
- 19 Gai Jakim, ma Zicri, ma Zabdi,
- 20 ma Elienai, ma Zillethai, ma Eliel,
- 21 ma Adaiiah, ma Beraiah, aama Shimrath go dama daane a Shimei.
- 22 Gai Ishpan, ma Eber, ma Eliel,
- 23 ma Abdon, ma Zicri, ma Hanan,
- 24 ma Hananiah, ma Elam, ma Anthothijah,
- 25 ma Iphdeiah, aama Penuel go dama daane a Shashak.

26 Gai Shamsherai, ma Shehariah, ma Athaliah,  
 27 ma Jareshiah, ma Elijah, aama Zicri go dama  
 daane a Jeroham.

28 Aanei dagi o denga huaabodu i olaadeu atan-  
 gada, gai gilaadeu ne nnoho i Jerusalem.

29 Jeiel tamana o Gibeon e noho i Gibeon. De  
 ingoo o dono bodu go Maacah.

30 Dana dama madua go Abdon, gai ono dua go  
 Zur, ma Kish, ma Baal, ma Nadab,

31 ma Gedor, ma Ahio, ma Zeker,

32 ma Mikloth, taane ne hagadili ina laa  
 Shimeah. Gilaadeu ne nnoho hogi ma e paa  
 ange gi olaadeu dangada i Jerusalem.

33 Ner ne hagadili a Kish, gai a Kish ne hagadili  
 a Saul, gai a Saul ne hagadili Jonathan, ma  
 Malki-Shua, ma Abinadab, aama Esh-Baal.\*

34 Tama daane a Jonathan: go Merib-Baal,† go ia  
 ne hagadili ina Micah.

35 Dama daane a Micah: go Pithon, ma Melek,  
 ma Tarea, aama Ahaz.

36 Gai Ahaz ne hagadili Jehoaddah; gai Je-  
 hoaddah ne hagadili Alemeth, ma Azmaveth,  
 aama Zimri. Gai Zimri ne hagadili Moza.

37 Moza ne hagadili Binea, tama daane a Binea  
 go Raphah, tama daane a Raphah go Eleasah, gai  
 tama daane a Eleasah go Azel.

38 Azel e dogoono ana dama daane, gai aanei  
 olaadeu ingoo: go Azrikam, ma Bokeru, ma  
 Ishmael, ma Sheariah, ma Obadiah, aama  
 Hanan. Aanei alodahi dama daane a Azel.

---

\* **8:33** *Esh-Baal*, aabe go Ish-Bosheth. † **8:34** *Merib-Baal*, aabe go  
 Mephibosheth.

<sup>39</sup> Gai dama daane a dono daina daane go Eshek: go Ulam dana dama madua, togolua go Jeush, gai togodolu go Eliphelet.

<sup>40</sup> Gai dama daane a Ulam ni daane hebagi dau, gai e aabo i de tili de mee hholu. Gai e soa alaadeu dama ma mogobuna – se 150 gilaadeu. Gilaadeu alodahi nei ni dangada de aamuli o Benjamin.

## 9

### *Dangada ne aahe mai i Babylon*

<sup>1</sup> Gai dangada alodahi o Israel ne sisi i denga atangada i lo te beebaa e daohi ai denga hodooligi o Israel.

Gai dangada o Judah ne noonoodia ga gaavee gi Babylon, i hiidinga gilaadeu tee hai hegau i de muna abodonu.

<sup>2</sup> Gai hanu dangada Israel ne aahe mai ga nnoho i olaadeu mommee i lodo olaadeu aduhale, madali de gau haimeedabu, ma dangada de aamuli o Levi, ma de gau e haia hegau o de hale daumaha.\*

<sup>3</sup> Gai hanu dangada de aamuli o Judah, ma Benjamin, ma Ephraim, aama Manasseh ne nnoho i Jerusalem:

<sup>4</sup> go Uthai, tama daane a Ammihud, tana daane a Omri, tama daane a Imri, tama daane a Bani, dahi dangada de aamuli o Perez, tama daane a Judah.

<sup>5</sup> Dangada o Shilon: go Asaiah, tama madua ma ana dama daane.

<sup>6</sup> Dangada o Zerah: go Jeuel.

---

\* **9:2** Ezra 2.27; Neh 7.73

Gai dangada mai i Judah se 690.

<sup>7</sup> Dangada o Benjamin: go Sallu, tama daane a Meshullam, tama daane a Hodaviah, tama daane a Hassenuah;

<sup>8</sup> ma Ibneiah, tama daane a Jeroham; ma Elah tama daane a Uzzi, tama daane a Micri; ma Meshullam, tama daane a Shephathiah, tama daane a Reuel, tama daane a Ibnijah.

<sup>9</sup> Gai dangada o Benjamin ne sisi i olaadeu atan-gada se 956. Denga daane nei alodahi ni dagi i olaadeu huaabodu.

<sup>10</sup> Aanei de gau haimeedabu: go Jedaiah, ma Jehoiarib, ma Jakin,

<sup>11</sup> ma Azariah, tama daane a Hilkihah, tama daane a Meshullam, tama daane a Zadok, tama daane a Meraioth, tama daane a Ahitub, go taane e dagina hegau i de hale o de Maadua;

<sup>12</sup> ma Adaiah, tama daane a Jeroham, tama daane a Pashhur, tama daane a Malkijah; ma Maasai, tama daane a Adiel, tama daane a Jahzerah, tama daane a Meshullam, tama daane a Meshillemith, tama daane a Immer.

<sup>13</sup> Dagi o denga huaabodu o de gau haimeedabu se 1,760. Gilaadeu ni daane e aabo i de hai hegau i lo te hale o de Maadua.

<sup>14</sup> Dangada de aamuli o Levi: go Shemaiah, tama daane a Hasshub, tama daane a Azrikam, tama daane a Hashabiah, se hagadilinga niio Merari;

<sup>15</sup> ma Bakbakkar, ma Heresh, ma Galal, aama Mattaniah tama daane a Mica, tama daane a Zicri, tama daane a Asaph;

<sup>16</sup> ma Obadiah, tama daane a Shemaiah, tama daane a Galal, tama daane a Jeduthun; ma

Berekiah, tama daane a Asa, tama daane a Elkanah, gilaadeu e noho i denga aduhale vaaligiligi o de gau Netophah.

<sup>17</sup> Denga daane e hagaloosi ina de haitoga: go Shallum, ma Akkub, ma Talmon, ma Ahiman, aama olaadeu daina ange laa, gai delaadeu dagi go Shallum.

<sup>18</sup> Gai gilaadeu nogo hagaloosi de haitoga o de hodoologi i de baasi gi dua. Denga daane hagaloosi nei ni dangada de aamuli o Levi.

<sup>19</sup> Shallum, tama daane a Kore, tama daane a Ebiasaph, tama daane a Korah, ma ono soa hagaloosi mai i dono huaabodu (de aamuli o Korah), go gilaadeu e hagaloosi ina de haitoga o de Hale Malo, bei de hai a olaadeu dubuna ne hagaloosi ai laa de haitoga o de mommee o TAGI MAOLUNGA e noho ai.

<sup>20</sup> Gai Phinehas, tama daane a Eleazar, go tagi o denga daane e hagaloosia de haitoga i mua, gai TAGI MAOLUNGA ne noho madali ia.

<sup>21</sup> Zechariah, tama daane a Meshelemiah, go taane e hagaloosia de haitoga o de hale malo hagabuni.

<sup>22</sup> Gai dangada alodahi ne hili gi hagaloosi ina denga haitoga, se 212. Olaadeu ingoo gu sisi madali denga huaabodu i olaadeu aduhale. Gai go David aama Samuel, taane e gidee mee e loomai, ne hilia ange gilaadeu gi denga duulanga nei.

<sup>23</sup> Gai go gilaadeu ma olaadeu hagaiilinga ne hagaloosia de hale o TAGI MAOLUNGA, go de hale e hagaiingoo ange laa go de Hale Malo.

<sup>24</sup> Gai de gau hagaloosi haitoga e hagaloosi denga baasi e haa o de hale daumaha: go de baasi

i dua, ma de baasi i dai, ma de baasi ngaiho, aama de baasi ngaage.

<sup>25</sup> Gai olaadeu dangada e nnoho laa i olaadeu aduhale vaaligiligi e loomai ma e sui gilaadeu ga hagaloosi ai i e dagihidu laangi.

<sup>26</sup> Aagai denga dagi dogohaa o de gau hagaloosi ni dangada de aamuli o Levi, go gilaadeu e diiloo ange denga aabi ma mommee doange i de hale o de Maadua.

<sup>27</sup> Gai gilaadeu e nnoho i luu baasi de hale o de Maadua; go hiidinga go gilaadeu e hagaloosi ina ma de huugea de hale laa i daiao alodahi.

<sup>28</sup> Hanu gilaadeu e tilo ange denga golea e hai ai hegau o taumaha; gilaadeu e tilo ga dau gi odi ange mee nei i de masavaa e gaamai ai gi lo te hale aama de hagassao ai gi daha.

<sup>29</sup> Hanu gilaadeu ne hili ange gi diiloo ange golea i lo te hale daumaha, ma gumedi dabu, ma pelaoaa lligi, ma uvaini, ma lolo, ma mee manongi e dudu laa, aama mee hagamanongi ange laa.

<sup>30</sup> Aagai go hanu dangada haimeedabu e hilo ina denga mee hagamanongi.

<sup>31</sup> Gai Mattithiah, dahi daane de aamuli o Levi, tama madua a Shallum taane Korah e hai pelaoaa.

<sup>32</sup> Gai hanu dangada de hagadiilinga o Kohath e hai denga pelaoaa o ssigidaumaha, e hagadabena ange laa gi denga Sabbath alodahi.

<sup>33</sup> Aanei de gau daahili, gilaadeu ni dagi i de aamuli o Levi. Gilaadeu ne nnoho i lodo aabi i de *temple*, gilaadeu e deai ange donu alaadeu hegau e hai, go hiidinga gilaadeu e hai alaadeu hegau donu i de laangi ma de boo alodahi.

<sup>34</sup> Denga daane nei alodahi ni dagi niio denga huaabodu i de aamuli o Levi, i olaadeu atangada, gai gilaadeu ne nnoho i Jerusalem.

*De atangada o Saul*

*(1 Ch 8.29-38)*

<sup>35</sup> Jeiel, tamana o Gibeon ne noho i Gibeon. Gai de ingoo o dono bodu go Maacah,  
<sup>36</sup> gai dana dama madua go Abdon, gai ono dua go Zur, ma Kish, ma Baal, ma Ner, ma Nadab,  
<sup>37</sup> ma Gedor, ma Ahio, ma Zechariah, aama Mikloth.

<sup>38</sup> Mikloth ne hagadili Shimeam. De gau nei ne nnoho ma e paa ange gi olaadeu dangada i Jerusalem.

<sup>39</sup> Gai a Ner ne hagadili a Kish, gai a Kish ne hagadili Saul, gai Saul ne hagadili Jonathan, ma Malki-Shua, ma Abinadab, aama Esh-Baal.\*

<sup>40</sup> Tama daane a Jonathan: go Merib-Baal,† go ia ne hagadili ina Micah.

<sup>41</sup> Dama daane o Micah: go Pithon, ma Melek, ma Tahrea, aama Ahaz.

<sup>42</sup> Ahaz ne hagadili Jadah, Jadah ne hagadili Alemeth, ma Azmaveth, aama Zimri; gai Zimri ne hagadili Moza.

<sup>43</sup> Moza ne hagadili Binea; tama daane a Binea go Rephaiah, tama daane a Rephaiah go Eleasah, gai tama daane a Eleasah go Azel.

<sup>44</sup> Azel e dogoono ana dama daane, aanei olaadeu ingoo: go Azrikam, ma Bokeru, ma

---

\* **9:39** *Esh-Baal*, aabe go Ish-Bosheth. † **9:40** *Merib-Baal*, aabe go Mephibosheth (2 Sa 4.4).

Ishmael, ma Sheariah, ma Obadiah, aama Hanan. Aanei dama daane a Azel.

## 10

### *De magau o Saul*

*(1 Sa 31.1-13)*

<sup>1</sup> Gai denga daane Philistia ne hebagi ange ai gi de gau Israel; gai denga daane Israel ga saavini ga hulo gee mai i gilaadeu, gai gilaadeu ne maakau i hongga de mounga go Gilboa.

<sup>2</sup> Gai denga daane Philistia ne doolohi a Saul ma ana dama daane, gai gilaadeu ne daa gu maakau Jonathan, ma Abinadab, aama Malki-Shua, denga dama daane a Saul.

<sup>3</sup> Gai gu kona de hebagi i de mommee o Saul iai laa, gai de gau e dilia mee hholu ne tili ia ga ulu, gai ia gu kona dono lagohia.

<sup>4</sup> Gai a Saul ne hai ange gi taane e sabaia ono goloa hebagi, “Haia dau gadilaasa velosia ai au gi magau, gi dee loomai ai denga daane tigi tuu dagaholiage naa gi vaivai hai au.”

Aagai taane laa e dee sabala, go hiidinga ia gu madagu. Gai a Saul ga hai dana gadilaasa ga velo ai donu huu ia.

<sup>5</sup> Gai ga gidee huu e taane e sabaia laa goloa hebagi o Saul bolo ia gu magau, gai ia ga velo hogi ia i dana gadilaasa, gai ia gu magau hogi.

<sup>6</sup> Gai a Saul ma ana dama daane dogodolu gu maakau, gai dono huaabodu alodahi gu maakau.

<sup>7</sup> Gai de masavaa o de gau Israel i de mommee soe ne gidee ai bolo de hagabuulinga hebagi o Israel gu saavini ma gu hulo, gai a Saul ma ana dama gu maakau, gai gilaadeu ga tili olaadeu

aduhale ga saavini ga hulo gee, gai de gau Philistia ga loomai ga nnoho ai.

<sup>8</sup> De laangi i ono dua, i de masavaa a de gau Philistia ne loomai ai e kave goloa o de gau maakau, gai gilaadeu gu gidee a Saul ma ana dama daane gu maakau i hongga de mounnga go Gilboa.

<sup>9</sup> Gai gilaadeu ga hagau ono malo ga tuu dono ua ma de kave ono goloa hebagi, gai gilaadeu ga hai hanu dangada i de henua o de gau Philistia gi hagadele ina ange ai de longo danuaa laa gi olaadeu diinonga ma olaadeu dangada.

<sup>10</sup> Gai gilaadeu ne kave goloa hebagi o Saul ga hhao gi lo te hale daumaha o olaadeu diinonga, gai ga daudau age dono biho i lo te hale daumaha o Dagon.

<sup>11</sup> Aagai ga langona huu e dangada o Jabesh Gilead hegau a de gau Philistia ne hai ange gi a Saul,

<sup>12</sup> gai denga daane hebagi dau alodahi ga hulo ga gaamai de angaanga o Saul ma ana dama gi Jabesh. Gai gilaadeu ga danu olaadeu ivi i lalo dahi *oak* laumalie i Jabesh, gai gilaadeu ga hagahi-ikai i e hidu laangi.\*

<sup>13</sup> Gai a Saul ne magau i hiidinga ia tee hai hegau i de muna abodonu ange gi TAGI MAOLUNGA; ia tee daohi muna a TAGI MAOLUNGA, aagai ia ne hano ga ssala de bale mai i daho dahi hahine hai huuhuaa mee,\*

<sup>14</sup> ia tee ssala de bale i daho TAGI MAOLUNGA. Deelaa ai, TAGI MAOLUNGA ne daa ia ga magau,

---

\* **10:12** 1 Sa 11.1-11    \* **10:13** Lev 19.31; 20.6; 1 Sa 13.8-14; 15.1-24; 28.7-8

ga gaavange dono nohoanga hodoologi gi David, tama daane a Jesse.

## 11

### *De hodoologi o David i Israel alodahi (2 Sa 5.1-10)*

<sup>1</sup> Gai de gau Israel alodahi ne loomai gi daho David i Hebron, ga hai ange, “Tilo, gimaadeu ni dangada donu niiou.

<sup>2</sup> De masavaa o Saul ne hodoologi ai i mua, gai go koe ne dagina Israel i de hebagi. Gai TAGI MAOLUNGA, doo Maadua gu hai adu, ‘Go koe e diiloo ange ogu dangada go de gau Israel, gai koe gi hodoologi i hongga o Israel.’”

<sup>3</sup> Gai dagi alodahi o Israel ne loomai gi daho de hodoologi i Hebron, gai David ga hai dahi hagatoo donu hagaheloongi madali gilaadeu i Hebron, i mada luu mada o TAGI MAOLUNGA, gai gilaadeu ga hagadabu David i de lolo gi hodoologi i Israel, bei de hai a TAGI MAOLUNGA gu tala ai gi gilaadeu i daho Samuel.

### *De hagadee kii a David Jerusalem*

<sup>4</sup> Gai David ma de gau Israel alodahi ne hulo gi Jerusalem, e bei go Jebus, de mommee o de gau Jebus, dangada o de henua e nnoho ai.\*

<sup>5</sup> Gai de gau Jebus ne hai ange gi David, “Koe e dee maua donu i de ulu mai gi kinei.” Gai David ne hebagi ange ga kave de mommee buibui o Zion, go de aduhale o David.

<sup>6</sup> Gai David ne hagadaba, “Be goai naa huu e daia de gau Jebus i mua, gai ia e hai ai tagi o denga

---

\* **11:4** Josh 15.63; Jdg 1.21

daane hebagi.” Gai Joab, tama daane a Zeruah, ne hano i mua, deela ai, go ia ne hai ai tagi o denga daane hebagi.

<sup>7</sup> Gai David ne hano ga noho i de mommee buibui makaga; gai de mommee laa gu hagaingoo ange go de aduhale o David.

<sup>8</sup> Ia ne hagaduu age hogi luu baasi de aduhale laa, mai i denga bae e daohia age luu baasi de buibui, ga hanage ai, gai Joab ne hagahe age mommee e doe i de aduhale.

<sup>9</sup> Gai David gu hagadagadaga ange de mmahi, go hiidinga TAGI o denga hagabuulinga hebagi e noho i ono daha.

*Denga daane mmahi o David*  
(2 Sa 23.8-39)

<sup>10</sup> Aanei ingoo o dagi o denga daane mmahi o David, gilaadeu ma dangada alodahi o Israel ne bale ange dono nohoanga hodoologi gi sula i hongga de henua alodahi, bei de hai a TAGI MAOLUNGA gu hagatoo donu ai i dagodo o Israel.

<sup>11</sup> Aanei denga daane mmahi o David:

Go Jashobeam, taane Hacmon, go ia tagi o denga daane dogodolu; \* gai ia ne hai dono dao ga hebagi ange ai gi e dolulau daane, ga daa gilaadeu gu maakau i dahi hanonga daudahi.

<sup>12</sup> Taane e mua ange gi de ia i denga daane dogodolu laa go Eleazar, tama daane a Dodo, taane Ahoh.

<sup>13</sup> Go ia ne noho madali David i Pas Dammin, i de masavaa o de gau Philistia ne loomai ai gi de hebagi i kilaa. De mommee laa se mommee iai

---

\* **11:11 dogodolu:** hanu beebaa duai ange laa e hai ange *dinodolu*.

denga veelengaa *barley*, gai denga daane Israel ne saavini ga hulo gee mai i de gau Philistia.

<sup>14</sup> Aagai Dodo ne duu donu huu i de mommee laa ga hebagi ai ma de daa ga maakau denga daane Philistia; gai TAGI MAOLUNGA ne hagaola gilaadeu ga hai gu kii de gau Israel.

<sup>15</sup> E dogodolu daane mai i denga dagi dinodolu laa ne hulo gi daho David i lo te haonga i gaogao de mounga i Adullam, i de masavaa o denga daane hebagi o Philistia e nnoho ai i lo te geelonga go Rephaim.

<sup>16</sup> De masavaa laa gai David e noho i lo te mommee buibui makaga, gai denga daane hebagi o Philistia e nnoho i Bethlehem.

<sup>17</sup> Gai David ne hagadaba age, “Mee naa gi dahi dangada e hano e gaamai hanu vai mai i de vai geli i gaogao de haitoga o de buibui o Bethlehem, e unu au!”

<sup>18</sup> Gai denga daane mmahi dogodolu laa ne ulu laa magavaa o denga daane hebagi o Philistia, ga hulo ai ga asu mai hanu vai i de vai geli i gaogao de haitoga i Bethlehem, ga gaamai gi David. Aagai David tee unu vai laa; ia ne llingi vai laa ga sigidaumaha ange ai gi TAGI MAOLUNGA,

<sup>19</sup> gai ia ne hagadaba, “De Maadua e dee dugu mai donu au gi unumia vai nei! E heohi dagu unu vai ne dai maakau ai denga daane nei? Gilaadeu ne hagangadi mee olaadeu mouli i delaadeu hulo ga asu mai vai nei.” Gai David tee unu donu vai laa.

Aanei hegau a denga daane mmahi dogodolu laa ne hai.

<sup>20</sup> Gai Abishai, taina daane o Joab, go tagi o

denga daane e dinodolu<sup>†</sup> laa. Ia ne hai dono dao ga daa ai ga maakau e dolulau daane, gai ia gu dau hogi madali denga daane dinodolu laa.

<sup>21</sup> Gai ne kii ange de laumalie dono hagadubu i denga daane dogodolu laa, gai go ia delaadeu dagi, aagai ia tee dau madali denga daane dogodolu laa.

<sup>22</sup> Gai Benaiah, tama daane a Jehoiada, ia se daane abo i de hebagi mai i Kabzeel, gai ne lagoonago ana hegau danuaa ne hai. Ia ne daa ga maakau e dogolua daane mmahi o Moab. Ia ne iho hogi gi lo te geelonga ga daa ai dahi laiono i de masavaa e loiho ai denga *snow*.

<sup>23</sup> Ia ne daa hogi ga magau dahi doa Egypt, taane laa se lima sugilima de looloa. Gai tao o taane Egypt laa e laumalie bei de laagau i ulu de mee llanga mee; aagai Benaiah ne hano iho ga hebagi ange i dono dogo, ga kave tao o taane Egypt laa ga daa ai ia gu magau.

<sup>24</sup> Aanei hegau a Benaiah, tama daane a Jehoiada ne hai; ia se daane dau hogi madali denga daane mmahi dogodolu laa.

<sup>25</sup> Ia se daane dau i magavaa o tinodolu laa, aagai ia tee dau madali denga daane dogodolu laa. Gai David ne hai ia go tagi o ono daane hagaloosi.

<sup>26</sup> Gai Asahel, taina daane o Joab, se daane dau i de hebagi madali Elhanan tama daane a Dodo, taane Bethlehem,

<sup>27</sup> ma Shammoth taane Haror, ma Helez taane Pelon,

<sup>28</sup> ma Ira tama daane a Ikkesh, taane Tekoa, ma Abiezer taane Anathoth,

---

<sup>†</sup> **11:20** *dinodolu*: hanu beebaa duai ange laa e hai ange *dogodolu*.

29 ma Sibbecai taane Hushah, ma Ilai taane Ahoh,

30 ma Maharai taane Netophah, ma Heled tama daane a Baanah, taane Netophah,

31 ma Ithai tama daane a Ribai, taane Gibeah o Benjamin, ma Benaiah taane Pirathon,

32 ma Hurai, taane mai i denga geelonga o Gaash, ma Abiel taane Arabah,

33 ma Azmaveth taane Baharum, ma Eliahba taane Shaalbon,

34 ma dama daane a Hashem taane Gizon, ma Jonathan tama daane a Shagee, taane Harar,

35 ma Ahiam tama daane a Sacar, taane Harar, ma Eliphai, tama daane a Ur,

36 ma Hephher taane Mekerah, ma Ahijah taane Pelon,

37 ma Hezro taane Carmel, ma Naarai tama daane a Ezbai,

38 ma Joel, taina daane o Nathan, ma Mibhar, tama daane a Hagri,

39 ma Zelek taane Ammon, ma Naharai, taane Beeroth, go taane e sabaia goloa hebagi a Joab, tama daane a Zeruiah,

40 ma Ira taane Jether, ma Gareb taane Jether,

41 ma Uriah taane Heth, ma Zabad, tama daane a Ahlai,

42 ma Adina, tama daane a Shiza, dahi hagadi-ilinga o Reuben, gai se dagi i de aamuli o Reuben, ma denga daane dinodolu madali ia,

43 ma Hanan, tama daane a Maacah, aama Joshaphat taane Methen,

44 ma Uzzia taane Ashterah, ma Shama ma Jeiel luu dama daane a Hotham, taane Aroer,

<sup>45</sup> ma Jediael, tama daane a Shimri, ma dono daina daane go Joha, taane Tiz,

<sup>46</sup> ma Eliel taane Mahavah, ma Jeribai ma Joshaviah, go dama daane a Elnaam, ma Ithmah taane Moab,

<sup>47</sup> ma Eliel, ma Obed, aama Jaasiel, taane Mezobah.

## 12

### *Denga daane hebagi dau o David*

<sup>1</sup> Gai aanei denga daane ne loomai gi daho David i Ziklag, i de masavaa oona nogo mmuni saele ai i a Saul, tama a Kish. (Gilaadeu nei ni daane madali denga daane hebagi dau ne balea ange ia i de hebagi.)

<sup>2</sup> Gilaadeu ni daane e hagenda ina mee hholu, gai e maua i de tili de mee hholu ma de maga de buada i de madau ma de masui; gilaadeu ni dangada niio Saul mai i de aamuli o Benjamin.)

<sup>3</sup> Delaadeu dagi go Ahiezer madali Joash tama daane a Shemaah, taane Gibeah; ma Jeziel ma Pelet luu dama daane a Azmaveth; ma Beracah, ma Jehu taane Anathoth,

<sup>4</sup> ma Ishmaiah taane Gibeon, go dahi daane dau i magavaa o denga daane dinodolu laa, gai se dagi niio laadeu; ma Jeremiah, ma Jahaziel, ma Johanan, ma Jozabad taane Gederah,

<sup>5</sup> ma Eluzai, ma Jerimoth, ma Bealiah, ma She-mariah, ma Shephatiah taane Haruph,

<sup>6</sup> ma Elkanah, ma Isshiah, ma Azarel, ma Joezer, ma Jashobeam, ni hagadiilinga niio Korah,

<sup>7</sup> ma Joelah ma Zebadiah, luu dama daane a Jeroham mai i Gedor.

<sup>8</sup> Hanu daane Gad ne loomai ga dau ange gi David i de mommee buibui makaga i lodo henua. Gai gilaadeu ni daane mmahi ma de dau i de hebagi, gai e aabo i de hebagi i de mee hungihungi ma tao. Olaadeu mada e hagamaatagu bei mada o denga laiono, gai e kemo bei denga *gazelle* i ulu mouna.

<sup>9</sup> Tagi go Ezer, togolua go Obadiah, togodolu go Eliab,

<sup>10</sup> togohaa go Mishmannah, togolima go Jeremiah,

<sup>11</sup> togoono go Attai, togohidu go Eliel,

<sup>12</sup> togovalu go Johanan, togosiva go Elzabad,

<sup>13</sup> tinoangahulu go Jeremiah, gai tinoangahulu ma dogodahi go Macbannai.

<sup>14</sup> Gai aanei dagi o denga daane hebagi i de aamuli o Gad; taane baageaa hugadoo e maua i de hebagi ange gi e lau daane, gai taane mmahi hugadoo e maua i de hebagi ange gi e mano daane.

<sup>15</sup> Aanei denga daane ne kau laa lo te vai o Jordan gi de baasi gee i tahi malama, go de masavaa e honu ai de vai, gai dangada alodahi e nnoho i lodo geelonga i de baasi i dua ma de baasi i dai o de vai gu maatagu ga saavini ga hulo gee.

<sup>16</sup> E hanu hogi daane de aamuli o Benjamin ma de aamuli o Judah ne hulo gi daho David i dono mommee buibui makaga.

<sup>17</sup> Gai David ne humai ga heda e ange gi gilaadeu, ga hai ange, “Noo goodou se loomai e hagaheloongoi mai gi de au ma de bale mai au, gai au e hagabuni adu gi goodou; gai noo goodou e kave denga longo gi ogu hagadaumee, gai tigi ai donu agu mee dee heohi ne hai, gai de Maadua o

odaadeu dubuna madagidagi gi hagaduasala ina goodou.”

<sup>18</sup> Gai de Hagasaalunga o de Maadua gu hano iho gi hong'a o Amasai, tagi o tinodolu, gai ia ne hai ange:

“David, gimaadeu e dau adu gi de goe!

Tama a Jesse, gimaadeu madali goe!

Koe gi noho baba, koe gi noho baba,

gai gi noho paba dangada e balea adu goe,

gai doo Maadua gu balea adu goe.”

Gai David ga abodonu ange gi gilaadeu, ga hai gilaadeu gi dagina denga hagabuulinga hebagi.

<sup>19</sup> E hanu hogi daane de aamuli o Manasseh ne hulo ga dau ange gi David, i de masavaa oona ne humai ai madali de gau Philistia e hebagi ange gi a Saul. (Gai David tee bale ange de gau Philistia, go hiidinga dagi o denga daane Philistia ne buni bolo e hai ia gi hano gee; gilaadeu ne hagataba, “E hagamanavasaa mai gi gidaadeu noo ia e tili gidaadeu gai ga hagabuni ange gi dono dangada aamua go Saul.”)

<sup>20</sup> De masavaa o David ne hano ai gi Ziklag, gai hanu hagadiilinga o Manasseh ne loomai ga dau ange gi de ia: go Adnah, ma Jozabad, ma Jediael, ma Michael, ma Jozabad, ma Elihu, aama Zil-lethai, gilaadeu ni dagi o denga mano i de vaaenga o Manasseh.

<sup>21</sup> Gilaadeu ne bale ange David ga hebagi ange ai gi de gau gaiaa ma de daa dangada; gilaadeu ni daane mmahi i de hebagi, gai gilaadeu ni dagi niio denga daane hebagi o David.

<sup>22</sup> Laangi alodahi gai e hanu dangada ne loomai e balea ange David, deelaai, gu soa mmao denga

daane hebagi i ono daha, bei de hagabuulinga hebagi o de Maadua.

<sup>23</sup> Gai aanei denga hagabuulinga hebagi ne loomai gi daho David i Hebron, ga gaavange ai de nohoanga hodooligi o Saul gi David, bei de hai a TAGI MAOLUNGA gu hagadaba ai laa:

<sup>24</sup> denga daane o Judah e hagauda ina de mee hungihungi ma dao – se 6,800;

<sup>25</sup> denga daane dau i de aamuli Simeon e paba ange gi de hebagi – se 7,100;

<sup>26</sup> denga daane o Levi – se 4,600;

<sup>27</sup> gai daane madali Jehoiada, tagi o de huaabodu o Aaron – se 3,700,

<sup>28</sup> ma Zadok, dahi dama daane mmahi i de hebagi, madali e dinolua ma dogolua dagi o de hebagi mai i dono huaabodu;

<sup>29</sup> gai denga daane o Benjamin, go dangada o Saul – gilaadeu se dolumano, de baasi soa i gilaadeu ne daudali ange i a Saul ga dae mai ai gi de masavaa laa;

<sup>30</sup> denga daane o Ephraim, ni daane mmahi ma de dau i delaadeu aamuli – se 20,800;

<sup>31</sup> denga daane dahi luu baasi de aamuli o Manasseh, ne hili laa i olaadeu ingoo, gi loomai gi hagasula ina David gi hodooligi – se 18,000;

<sup>32</sup> denga daane o Issachar, ni daane e tonu ange gi dagodo o de masavaa, ma de iloo de mee a de gau Israel e heohi i de hai – e lualau dagi madali olaadeu daane alodahi;

<sup>33</sup> denga daane o Zebulun, ni daane gu paba ange gi de hebagi, madali denga hagadaagan-gaa golea hebagi alodahi, gai ne buni bolo

gilaadeu tee lua lodo donu i de bale ange David – se limasemada;

<sup>34</sup> denga daane o Naphtali – se mano olaadeu dagi, madali e 37,000 daane hebagi e hagenda ina mee hungihungi ma dao;

<sup>35</sup> denga daane o Dan gu paba ange gi de hebagi – se 28,600;

<sup>36</sup> denga daane de aamuli o Asher, gilaadeu gu aabo ange ma de paba ange gi de hebagi – se haasemada;

<sup>37</sup> denga daane de aamuli o Reuben ma Gad aama dahi luu baasi de aamuli o Manasseh, i baasi dua o Jordan, gu dau denga hagenda-gangaa gola hebagi – se 120,000.

<sup>38</sup> Denga daane hebagi nei alodahi ne hagatau ga loomai ai madali olaadeu hagabuulinga gi Hebron, e hagasula ai David gi hodoologi i Israel alodahi. Gai de gau Israel ange laa ne buni ange hogi bolo e hai David gi hodoologi.

<sup>39</sup> Gai gilaadeu ne nnoho i daho David i kilaa i e dolu laangi, ga gaimee ai ma de unu, go hiidinga olaadeu huaabodu ne hagenda-bena alaadeu gai e gaimee ai.

<sup>40</sup> Gai dangada e paa ange gi gilaadeu mai loo i Issachar, ma Zebulun aama Naphtali, ne hagenda mai hanu gai i hongaga denga *donkey*, ma gamelo, ma *donkey* aama hongaga denga kaau ga loomai ai. Gai ne lagolago pelaoa lligi, ma duudangaa *fig*, ma duudangaa *raisin*, ma uvaini ma lolo, ma kaau aama ssiibi, go hiidinga de henua o Israel gu honu i de malangilangi.

*De hagahe mai o de ngavesi a de Maadua  
(2 Sa 6.1-11)*

<sup>1</sup> Gai David ne hagasaele madali denga dagi alo-dahi, go dagi o de mano ma dagi o de lau.

<sup>2</sup> Gai ia ga hai ange gi de hagabuulingaa dangada o Israel, “Noo e danuaa mai i oodou daha, gai se ha-gatau mai i daho TAGI MAOLUNGA, taadeu Maadua, gai gidaadeu ga aalu odaadeu daina alodahi i denga vaaenga o Israel, ma de gau haimeedabu, ma de aamuli o Levi, e nnoho laa madali gilaadeu i olaadeu aduhale ma olaadeu mommee iai helii, gilaadeu gi loomai gi hagabuni madali gidaadeu.

<sup>3</sup> Gai gidaadeu ga hulo e hagahe mai de ngavesi a de Maadua gi odaadeu daha, go hiidinga gidaadeu ne hawangadi mee de ngavesi laa i de masavaa o Saul.”

<sup>4</sup> Gai dangada alodahi gu hagabuni laa gu buni e hai de hegau laa, go hiidinga dangada alodahi gu malangilangi i de mee laa.

<sup>5</sup> Gai David ne hagabuni de gau Israel alodahi, mai i ssaalingaa vai go Shihor i Egypt ga dae ai gi Lebo Hamath, bolo gilaadeu ga hulo e gaamai de ngavesi a de Maadua i Kiriath Jearim.\*

<sup>6</sup> Gai David ma dangada alodahi o Israel ne hulo gi Baalah (e bei go Kiriath Jearim) i Judah, e gaamai de ngavesi a de Maadua, gu hagamabu ange laa gi de ingoo o TAGI MAOLUNGA, go de ia e noho laa i magavaa luu *cherubim*.\*

<sup>7</sup> Gai gilaadeu ga hagama ange de ngavesi a de Maadua gi hongaa dahi hada hoou mai i de hale

---

\* 13:5 1 Sa 7.1-2      \* 13:6 Exo 25.22

o Abinadab, gai go Uzzah ma Ahio ne dagina de hada laa.

<sup>8</sup> Gai David ma de gau Israel alodahi ne malangi-langi mmao i mada luu mada o de Maadua, i de daahili ma de hagadangidangi i denga *lyre*, ma *harp*, ma *tambourine*, ma *cymbal* aama *trumpet*.

<sup>9</sup> De masavaa olaadeu ne tae ai gi de mommee hili huamanu a Kidon, gai Uzzah ga haalo ange dono lima e daohi ai de ngavesi laa, go hiidinga luu kaau laa gu dai baakuu.

<sup>10</sup> Gai TAGI MAOLUNGA gu lili mmao i Uzzah; gai ia ga daa ia gu magau, go hiidinga ia gu poo ange gi de ngavesi laa. Gai ia ne magau donu huu i kilaa i mada luu mada o de Maadua.

<sup>11</sup> Gai David gu lili i hiidinga de bole o TAGI MAOLUNGA ga daa Uzzah gi magau. Gai de mommee laa gu hagaingoo ange go Perez Uzzah,\* ga dae mai ai gi anailaa nei.

<sup>12</sup> Gai David gu madagu i de Maadua i de laangi laa, ga hagadaba, “Dee hee dagu hai e kave ai de ngavesi a de Maadua gi dogu hale?”

<sup>13</sup> Gai ia tee kave de ngavesi laa gi ono daha i de aduhale o David, aagai ia ne dugu i de hale o Obed-Edom, taane Gath.

<sup>14</sup> Gai de ngavesi a de Maadua ne dagodo i daho de huaabodu o Obed-Edom i e dolu malama; gai TAGI MAOLUNGA ga hagamanuuia dono huaabodu ma ana mee alodahi.\*

---

\* **13:11** *Perez Uzzah* i muna Hebrew e bei go *de hagaduasala o Uzzah*. \* **13:14** 1 Ch 26.4-5

# 14

## *De hale o David ma ana dama (2 Sa 5.11-16)*

<sup>1</sup> Gai Hiram, de hodoologi o Tyre, ne hai hanu dangada gi loomai gi daho David, ma hanu laagau cedar, ma hanu labagau o denga hadu ma laagau, gi hagaduulia de hale o David.

<sup>2</sup> Gai David gu donu iho bolo TAGI MAOLUNGA gu hagasula ia gi hodoologi i hongia Israel, gai dono nohoanga hodoologi gu hagamaolunga, i hiidinga o ono dangada go de gau Israel.

<sup>3</sup> Gai David ne hai bodu ange hogi gi hanu haahine i Jerusalem, ga hagdili ange ai hogi hanu dama daane ma damaa hine.

<sup>4</sup> Gai aanei ingoo o ana dama ne hagdili i kilaa: go Shammua, ma Shobab, ma Nathan, ma Solomon,

<sup>5</sup> ma Ibhar, ma Elishua, ma Elpelet,

<sup>6</sup> ma Nogah, ma Nepheg, ma Japhia,

<sup>7</sup> ma Elishama, ma Beeliada, aama Eliphelet.

## *De hagadee kii a David de gau Philistia (2 Sa 5.17-25)*

<sup>8</sup> De masavaa huu a de gau Philistia ne langona ai bolo David gu hagdabu gi hodoologi i Israel, gai denga daane alodahi o Philistia ne loomai e ssala ia. Aagai ga langona huu e David, gai ia ga hano e hebagi ange gi gilaadeu.

<sup>9</sup> Gai denga daane Philistia ne loomai ga vaivai hai dangada i de geelonga go Rephaim.

<sup>10</sup> Gai David ne ssili ange gi de Maadua, “Ga hano au e hebagi ange gi de gau Philistia? Koe e dugu mai au gi hagadee kii ina gilaadeu?”

Gai TAGI MAOLUNGA ga hai ange gi de ia, “Hannoo, gai au e dugu adu naa goe gi hagadee kii ina gilaadeu.”

<sup>11</sup> Gai David ne hano gi Baal Perazim ga hagadee kii ai gilaadeu i kilaa; gai ia ga hagadaba, “De Maadua gu hagadee kii ugu hagadaumee bei dagodo o tolona e oohaa laa ga sao i de baasi laa.” Deelaa ai, de mommee laa gu hagaingoo ange go Baal Perazim.\*

<sup>12</sup> Gai de gau Philistia ne tili olaadeu diinonga i kilaa, gai David ga hai ange gi ono daane gilaadeu gi duungia diinonga laa.

<sup>13</sup> Gai de gau Philistia ne aahe mai ange hogi ga vaivai hai dangada i lo te geelonga;

<sup>14</sup> gai David ne ssili ange gi de Maadua, gai de Maadua ga hai ange gi de ia, “Aude hagasoe gi hano gi olaadeu mada i mua, aagai koe hannoo holiage mai ga hebagi ange ai gi gilaadeu i de baasi laa o denga *balsam*.

<sup>15</sup> Gai de masavaa naa huu aau e langona ai de seese o dangada i hongga denga *balsam*, gai koe ga daamada de hebagi; go hiidinga de Maadua e hano naa i oo mada i mua ga daa gi maakau denga daane hebagi o Philistia.”

<sup>16</sup> Gai David ne hai ga bei muna a de Maadua gu tala ange gi de ia, gai ia ga daa gu maakau denga daane Philistia mai i Gibeon ga dae ai gi Gezer.

<sup>17</sup> Gai longo o David gu dele i denga henua alodahi, gai TAGI MAOLUNGA ga hai denga huaahenua alodahi gi maatagu i de ia.

---

\* **14:11** *Baal Perazim* i muna Hebrew e bei go *de ia aamua e oohaa ga sao gi de baasi laa*.

# 15

## *De ngavesi o de hainga gu gaamai gi Jerusalem (2 Sa 6.12-22)*

<sup>1</sup> Dua de hagatuu a David ono hale i de aduhale o David, gai ia ne hagadabena dahi mommee e dugu ai de ngavesi a de Maadua, ma de hagaduu dahi hale malo e dugu ai.

<sup>2</sup> Gai David ne hagadaba, “E deai ange donu dangada e sabaia de ngavesi a de Maadua, go denga daane donu huu de aamuli o Levi, go hiidinga go gilaadeu a TAGI MAOLUNGA gu hili gi sabaia de ngavesi a TAGI MAOLUNGA, aama de hai hegau ange gi de ia ga hano ai.”\*

<sup>3</sup> Gai David ga hagabuni mai de gau Israel alo-dahi gi Jerusalem, gai gilaadeu ga hulo ai e gaamai de ngavesi a TAGI MAOLUNGA gi de mommee aana gu hagadabena laa.

<sup>4</sup> Gai David ga hagabuni denga hagadiilinga o Aaron ma de aamuli o Levi.

<sup>5</sup> Mai i hagadiilinga o Kohath: tagi go Uriel gai e 120 ono dangada madali ia;

<sup>6</sup> mai i de hagadiilinga o Merari, tagi go Asaiah, gai e 220 ono dangada madali ia;

<sup>7</sup> mai i de hagadiilinga o Gershom: tagi go Joel, gai e 130 ono dangada madali ia;

<sup>8</sup> mai i de hagadiilinga o Elizaphan: tagi go Shemaiah, gai e lualau ono dangada madali ia;

<sup>9</sup> mai i de hagadiilinga o Hebron: tagi go Eliel, gai e dinovalu ono dangada madali ia;

---

\* 15:2 Deut 10.8

<sup>10</sup> mai i de hagadiilinga o Uzziel: tagi go Amminadab, gai e 112 ono dangada madali ia.

<sup>11</sup> Gai David ne hagahi luu dangada haimeedabu go Zadok ma Abiathar, ma Uriel, ma Asaiah, ma Joel, ma Shemaiah, ma Eliel, aama Amminadab, go hanu daane de aamuli o Levi,

<sup>12</sup> ga hai ange gi gilaadeu, “Go goodou denga dagi o denga huaabodu i de aamuli o Levi; deenei ai, goodou ma oodou dangada gi hagagilimalali ina goodou, gi maua ai e goodou i de hulo e gaamai de ngavesi a TAGI MAOLUNGA, de Maadua o Israel, e dugu i de mommee aagu gu hagadabena.

<sup>13</sup> Go hiidinga goodou tee hagauda de ngavesi laa i de hanonga i taamada, deelaai ai, TAGI MAOLUNGA taadeu Maadua ne bole ga hai baasi mai gi gidaadeu. Gidaadeu tee ssili hogi i ono daha dono hai e hai ai.”

<sup>14</sup> Gai de gau haimeedabu ma denga daane de aamuli o Levi ne hagagilimalali gilaadeu, gi maua ai e gilaadeu i de hulo e gaamai de ngavesi a TAGI MAOLUNGA, de Maadua o Israel.

<sup>15</sup> Gai denga daane de aamuli o Levi ne poo denga laagau i luu baasi de ngavesi a de Maadua ga saabai ai i hongga olaadeu eu, bei de hai a Moses gu tala ange ai laa gi gilaadeu, gi bei muna a TAGI MAOLUNGA.\*

<sup>16</sup> David ne hai ange hogi gi dagi o de aamuli o Levi gilaadeu gi hilia hanu olaadeu daane gi daahili i de malangilangi ma de hagadangidangi i denga *harp* ma *lyre* aama denga *cymbal*.

<sup>17</sup> Gai de hagadiilinga o Levi ne hili Heman, tama daane a Joel; go ono daina, go Asaph tama

---

\* 15:15 Exo 25.14

daane a Berekiah; gai mai i dama a Merari, go Ethan tama daane a Kushaiah;

<sup>18</sup> madali hanu olaadeu dangada mai i de lua hagabuulinga, go Zechariah,\* ma Jaaziel, ma Shemiramoth, ma Jehiel, ma Unni, ma Eliab, ma Benaiah, ma Maaseiah, ma Mattithiah, ma Eliphelehu, aama Mikneiah, aama Obed-Edom ma Jeiel luu daane hagaloosi.

<sup>19</sup> De gau daahili go Heman ma Asaph, aama Ethan gi hagamangidangi i denga *cymbalbronze*;

<sup>20</sup> gai Zechariah, ma Aziel, ma Shemiramoth, ma Jehiel, ma Unni, ma Eliab, ma Maaseiah, aama Benaiah e hagamangidangi i denga *harp* ma de hua madali de *Alamoth*;†

<sup>21</sup> gai Mattithiah, ma Eliphelehu, ma Mikneiah, ma Obed-Edom, ma Jeiel, aama Azariah e hagamangidangi i denga *lyre* ma de daahili madali de *Sheminith*.‡

<sup>22</sup> Gai Kenaniah, taane de aamuli o Levi e dagina laa de gau daahili, ne hai de hegau laa i hiidinga ia se daane e mmau i de hai daahili.

<sup>23</sup> Gai Berekiah ma Elkanah gi hagaloosia de ngavesi a de Maadua.

<sup>24</sup> Shebaniah, ma Joshaphat, ma Nethanel, ma Amasai, ma Zechariah, ma Benaiah, aama Eliezer, de gau haimeedabu, gi ilihia denga *trumpet* i mada i mua o de ngavesi a de Maadua. Gai Obed-

---

\* **15:18** *Zechariah*: hanu beebaa duai ange laa e hai ange *Zechariah* ma tama daane, aabe go *Zechariah* ma *Ben*. † **15:20** de *Alamoth*se muna ange gi de baasi o denga daahili ma mee hagamangidangi; hanu e maanadu bolo e hua i leo o denga gauligi haahine, aabe se daahili e langi gi maolunga. ‡ **15:21** de *Sheminith*se muna ange gi denga hai daahili.

Edom ma Jehiah gi hagaloosia de ngavesi a de Maadua.

<sup>25</sup> Gai David ma denga daane maatua aama denga dagi o de mano ne hulo e gaamai de ngavesi o de hagatoo donu hagaheloongoi a TAGI MAOLUNGA i de hale o Obed-Edom i de malangilangi.

<sup>26</sup> Gai go hiidinga de Maadua ne bale ange denga hagadiilinga o Levi ne sabaia de ngavesi o de hagatoo donu hagaheloongoi a TAGI MAOLUNGA, gai ne hai ssigidaumaha i e hidu kaau daane ma e hidu ssiibi daane.

<sup>27</sup> Gai David ne gahu i ono malo *linen* danuaa, madali denga daane alodahi de aamuli o Levi ne sabaia de ngavesi laa, ma de gau daahili, ma Kenaniah, tagi o de gau daahili. David ne gahu hogi i dahi *ephod* e hai i *linen*.

<sup>28</sup> De masavaa a de gau Israel alodahi ne gaamai ai de ngavesi o de hagatoo donu hagaheloongoi a TAGI MAOLUNGA, gai gilaadeu ne hevaalogi, ma de ili denga hanga manu, ma *trumpet*, ma de hagadangidangi i denga *cymbal*, ma *harp* aama *lyre*.

<sup>29</sup> De masavaa o de ngavesi o de hagatoo donu hagaheloongoi a TAGI MAOLUNGA ne dae mai ai gi de aduhale o David, gai Michal, tamaa hine a Saul, e haina mai mee e hai i dahi abaaba damaa mee. Gai ia gu gidee de hodoologi go David e anu ma de malangilangi, gai ia gu kino i de ia.\*

## 16

<sup>1</sup> Gai gilaadeu ne gaamai de ngavesi a de Maadua ga dugu i lo te hale malo a David gu ha-

---

\* **15:29** 1 Sa 18.27

gaduu laa; gai gilaadeu ga hai denga sigidaumaha dudu ma sigidaumaha hagianuaa magavaa i mada luu mada o de Maadua.

<sup>2</sup> Gai de masavaa a David ne hagalava ai denga sigidaumaha dudu ma sigidaumaha hagianuaa magavaa, gai ia ga hagamauua dangada i de ingoo o TAGI MAOLUNGA.

<sup>3</sup> Gai ia ne duha ange dagidahi duudangaa pelaoaa, ma hanu *date* puli, ma hanu *raisin* puli gi daane ma haahine alodahi o Israel.

<sup>4</sup> Ia ne hili ange hogi hanu daane de aamuli o Levi gi haia hegau i mada i mua o de ngavesi a TAGI MAOLUNGA, gi dalodalo, ma de hagaanee ange de abodonu, aama de tuhi TAGI MAOLUNGA, de Maadua o Israel.

<sup>5</sup> Tagi go Asaph, togolua go Zechariah, ma Jeiel, ma Shemiramoth, ma Jehiel, ma Mattithiah, ma Eliab, ma Benaiah, ma Obed-Edom, aama Jeiel. Gilaadeu nei ne hagianuua i denga *harp* ma *lyre*, gai Asaph ne hagianuua denga *cymbal*;

<sup>6</sup> gai Benaiah ma Jahaziel go luu dangada haimeedabu e ilihia denga hanga manu i masavaa alodahi i mada i mua o de ngavesi o de hagianuua donu hagianuua o de Maadua.

*Taahili tuhi a David*

*(Psa 105.1-15; 96.1-13; 106.1, 47-48)*

<sup>7</sup> De laangi laa gai David ne hili Asaph ma ono dangada ange laa gi daahili ma de hagianuua ange de abodonu gi TAGI MAOLUNGA:

<sup>8</sup> Hagianuua ange de abodonu gi TAGI MAOLUNGA, dalodalo i dono ingoo; daalaa dagodo ana hegau i daho denga huahenua.

<sup>9</sup> Daahili ange gi de ia i taahili tuhi,  
daalaa dagodo o ana hegau hagalele mouli alo-  
dahi.

<sup>10</sup> Hagamahamaha ina dono ingoo dabu;  
dangada alodahi e saalaa TAGI MAOLUNGA gi  
malangilangi!

<sup>11</sup> Saalaa TAGI MAOLUNGA ma ono mahi;  
saalaa ia i masavaa alodahi.

<sup>12</sup> Manadua ana hegau hagalele mouli,  
ana sauua ma ana hagamodu gu tala.

<sup>13</sup> De aamuli o Israel, dono dangada hai hegau,  
de hagadiilinga o Jacob, go dangada aana gu hili.

<sup>14</sup> Go ia go Iahweh taadeu Maadua;  
ana hagamodu muna e hai ange gi henua i lalo  
alodahi.

<sup>15</sup> Ia e manadua dana hagatoo donu hagaheloon-  
goi ga hano ai,

ma ana muna gu tala, ange gi e mano atangada,

<sup>16</sup> go dana hagatoo donu hagaheloongoi ange gi  
Abraham,

ma dana hagatoo donu ange gi Isaac.\*

<sup>17</sup> Ia ne hai gi too donu ange gi Jacob de hainga nei,  
ma de hai dahi hagatoo donu hagaheloongoi ange  
gi Israel ga hano ai:\*

<sup>18</sup> “Au e gaavadu naa gi de goe de henua go Canaan  
e hai ai de mommee oou e henua ai.”

<sup>19</sup> De masavaa olaadeu goi sogoisi ai,  
e dee dau, gai ni dangada henua gee i de henua laa,  
<sup>20</sup> gilaadeu ne silivaaha saele i denga huaahenua,

---

\* **16:16** Gen 12.7; 26.3      \* **16:17** Gen 28.13

mai i dahi nohoanga hodoologi gi dahi nohoanga hodoologi.

21 Gai ia tee dugu ange dahi gi hagaduasala ina gilaadeu;

ma de hagasee denga hodoologi i olaadeu hiidinga, ga hai ange,\*

22 “Goodou e dee poo ange gi gilaadeu aagu gu hagadabu i de lolo, gai gi dee hammae ina ogu pelaabisi.”

23 Henua i lalo alodahi, daahili ange gi TAGI MAOLUNGA;

daalaa dagodo o dana hagaola i laangi alodahi.

24 Daalaa dagodo o dono mahamaha i magavaa o denga huaahenua,

ma ana hegau hagalele mouli ange gi dangada alodahi.

25 TAGI MAOLUNGA e maolunga mmao,

gai e heohi taadeu tuhi ia;

gai gi kii ange taadeu maatagu

i de ia i denga maadua alodahi.

26 Go hiidinga maadua alodahi o denga huaahenua ni ngadi diinonga;

aagai go TAGI MAOLUNGA ne haia de langi.

27 De mahamaha ma ssauaa i ono mada i mua;

de mmahi ma de malangilangi i dono mommee noho.

28 Huaabodu o denga huaahenua, goodou daalaa dagodo o TAGI MAOLUNGA,

daalaa dagodo de mahamaha ma de mmahi o TAGI MAOLUNGA.

29 Goodou daalaa dagodo de mahamaha

---

\* 16:21 Gen 20.3-7

o de ingoo o TAGI MAOLUNGA.  
 Goodou gaamai dahi sigidaumaha loomai ai gi  
 mada luoono mada.

Daumaha ange gi TAGI MAOLUNGA  
 i de mahamaha o dono dabu.

<sup>30</sup> Henua i lalo alodahi gi bolebole i ono mada i  
 mua!

Henua i lalo gu hagaduu ma gu makaga,  
 gai e dee maua naa donu gi baguu.

<sup>31</sup> De langi gi malangilangi,  
 henua i lalo gi lodo danuaa;  
 gilaadeu gi daalaa i daho denga huaahenua,  
 “Go TAGI MAOLUNGA e dagina!”

<sup>32</sup> Tai ma mee alodahi iai gi hagangolo,  
 denga duu malaetae ma mee alodahi iai gi  
 malangilangi!

<sup>33</sup> Denga manu ssomo i lodo henua gi daahili i de  
 malangilangi

i mada luu mada o TAGI MAOLUNGA,  
 go hiidinga ia e humai naa  
 e hagamodu muna o henua i lalo.

<sup>34</sup> Hagaaha ange de abodonu gi TAGI MAOLUNGA,  
 go hiidinga ia e danuaa;  
 dono abodonu e dee helui ga hano ai.\*

<sup>35</sup> Goodou hagataba,  
 “De Maadua demaadeu Ia Hagaola;  
 hagaola ina gimaadeu,  
 hagabuni ina mai gimaadeu  
 ma de hagaola mai gimaadeu i denga huaahenua,  
 gai gimaadeu ga tuhi ai doo ingoo dabu,

---

\* **16:34** 2 Ch 5.13; 7.3; Ezra 3.11; Psa 100.5; 106.1; 107.1; 118.1;  
 136.1; Jer 33.11

ma de hagamahamaha goe i de tuhi.

<sup>36</sup> Duuhia TAGI MAOLUNGA, de Maadua o Israel, mai i de masavaa e dee ngado mai ga dae ai gi de masavaa e dee ngado mai.” Gai dangada alodahi ne hagataba, “Amen!” aama de tuhi TAGI MAOLUNGA.

<sup>37</sup> Gai David ne dugu Asaph ma ono dangada ange laa i mada i mua o de ngavesi o de hagateo donu hagateoongi a TAGI MAOLUNGA, gai gilaadeu ga hai hegau i kilaa i de laa tubua, i mee gu hagatau ange gi dahi laangi.

<sup>38</sup> Ia ne hai hogi Obed-Edom ma ono dangada e dinoono ma dogovalu gi hai hegau madali gilaadeu. Gai go Obed-Edom, tama daane a Jeduthun, aama Hosah e hagaloosia ina de haitoga.

<sup>39</sup> Ia ne hai hogi Zadok, tangada haimeedabu, ma de gau haimeedabu ange laa, gi nnoho i gaogao de *tabernacle* o TAGI MAOLUNGA, i de mommee daumaha i Gibeon,

<sup>40</sup> gai gilaadeu ne hai denga sigidaumaha dudu ange gi TAGI MAOLUNGA, i hongaga de mommee o sigidaumaha dudu i de laa tubua, i taiao ma de ahiahi, bei de hai gu sisi ai laa i lodo hainga a TAGI MAOLUNGA ne gaavange laa gi de gau Israel.

<sup>41</sup> Gai Heman ma Jeduthun ni dangada hogi ne hili ma de daohi olaadeu ingoo, gi hagee ange de abodonu gi TAGI MAOLUNGA, “i hiidinga dono abodonu e dagodo ga hano ai.”

<sup>42</sup> Heman ma Jeduthun go luu daane e dagina dangada e ilihia denga *trumpet* ma de hagee denga *cymbal*, ma de hagee denga mee hagee denga madali denga daahili dabu. Gai

denga dama daane a Jeduthun e tuu i gaogao de haitoga o de buibui.

<sup>43</sup> Gai dangada alodahi ne aahe gi olaadeu hale, gai David ne ahe hogi gi dono hale ga hagamanuia dono huaabodu.\*

## 17

### *De hagatoo donu a de Maadua*

*(2 Sa 7.1-17)*

<sup>1</sup> Gai ga noho huu David i dono hale, gai ia ga hai ange gi de pelaabisi go Nathan, “Tilo, au gu noho i dahi hale e hai i laagau *cedar*, aagai de ngavesi o de hagatoo donu hagaheloongoi a TAGI MAOLUNGA e dugu i lalo dahi hale malo.”

<sup>2</sup> Gai Nathan ga hai ange gi David, “Haia gi bei mee alodahi aau gu maanadu de hai; go hiidinga de Maadua gi noho madali goe.”

<sup>3</sup> Aagai de boo laa gai TAGI MAOLUNGA ne hagailoo ange ana muna gi Nathan, ga hai ange,

<sup>4</sup> “Hannoo hai ange gi dogu dangada hai hegau go David, ‘E hagadaba TAGI MAOLUNGA: E dee go koe e hagaduulia dahi hale e noho ai au.

<sup>5</sup> Au tigi noho donu i dahi hale abodonu, mai i de masavaa aagu ne hagassao mai ai de gau Israel i Egypt, ga dae mai ai gi anailaa nei, aagai au ne noho i lodo hale malo i dennga mommee oogu ne hano aagena.

<sup>6</sup> Gai mommee alodahi oogu ne hano ai madali de gau Israel, gai au tee ssili ange donu gi hanu dagi o de gau Israel, aagu gu hai laa gi dagina ogu

---

\* **16:43** 2 Sa 6.19-20

dangada, “Gu aha tigi hagaduulia ai naa e goodou dahi hale i laagau *cedar* e noho ai au?””

<sup>7</sup> Deenei ai, hai ange gi dogu dangada hai hegau go David, ‘E hagadaba TAGI o denga hagabuulinga hebagi: Au ne kave gee goe mai i de mommee iai helii, ma mai i de hagaloosi ange denga ssiibi, gai koe ga dagi ai ogu dangada go de gau Israel.

<sup>8</sup> Gai au ne noho madali goe i mommee alodahi oou ne hano aagena, ma de dugu adu goe gi hagadee kii ina oo hagadaumee alodahi. Gai au e hai naa goe gi se dangada maolunga, bei dagodo o de gau maolunga o henua i lalo.

<sup>9</sup> Gai au e hagadabena naa dahi mommee moo ogu dangada go de gau Israel, gi dahi ai olaadeu mommee donu, gu deai dangada e hakoso ina gilaadeu. Gai de gau baubau gu dee aahe ange e vaivai hai gilaadeu, bei alaadeu mee ne hai i taamada,

<sup>10</sup> mai i de masavaa aagu ne hai ai de gau hagamodu muna gi dagina ogu dangada go de gau Israel. Gai au e hagadee kii naa hogi oo hagadaumee alodahi.

Au ne tala adu hogi bolo TAGI MAOLUNGA e hai naa gi dahi oo hale.

<sup>11</sup> Gai de masavaa naa huu e odi ange ai oo laangi, gai koe e magau naa ga hano gi daho oo dubuna, gai au e hai naa dahi oo hagadiilinga e suuia goe, go dahi au dama daane donu, gai au e hai naa gi dagodo dono nohoanga hooligi ga hano ai.

<sup>12</sup> Gai go ia e hagaduulia dogu hale, gai au e hai naa dono nohoanga hooligi gi dagodo ga hano ai.

13 Au e hai naa go dono damana, gai ia go dagu dama. Gai au e dee helui naa donu dogu aloha i de ia, bei dagu hai ne helui ai laa dogu aloha i de hodooligi i mua.\*

14 Aagai au e hai naa ia gi dagina ogu dangada, ma de noho i hongu dogu nohoanga hodooligi ga hano ai; gai dono nohoanga hodooligi e dagodo naa donu huu ga hano ai.’”

15 Aanei muna alodahi a Nathan ne tala ange gi David, bei dagodo de midi gu hagaago ange gi de ia.

*Tangidangi a David*  
(2 Sa 7.18-29)

16 Gai de hodooligi go David ne hano ga noho i mada luu mada o TAGI MAOLUNGA, ga hai ange, “TAGI MAOLUNGA, de Maadua, se aha donu au, gai se aha dogu huaabodu, gai koe ga hai mai ai de hegau nei gi de au?

17 De Maadua, e dee deenei donu huu dau mee gu hai; gai koe gu tala hogi dagodo o de aamuli o doo dangada hai hegau i muli mai. TAGI MAOLUNGA de Maadua, koe gu hai ai au gi bei dagodo o de gau maolunga.

18 Gai aahee ange naa agu muna e tala adu, i dau hagamubu doo dangada hai hegau? Koe e iloo dagodo o doo dangada hai hegau!

19 TAGI MAOLUNGA, go hiidinga o doo dangada hai hegau, aama dagodo o oo lodo donu, koe gu hai de hegau laumalie nei ma de hai gi iloo dagodo o au hagatoo donu.

---

\* 17:13 2 Co 6.18; Heb 1.5

<sup>20</sup> TAGI MAOLUNGA, e deai ange donu e bei oo dagodo, gai e deai ange donu se Maadua, go koe donu huu, bei demaadeu hai gu langona ai.

<sup>21</sup> Gai goai de huaahenua e bei dagodo o oo dangada go de gau Israel – go de huaahenua a de Maadua ne hagaola e hai ai ono dangada donu, gai koe ga hai ai doo ingoo gi maolunga hagamaatagu, i dau hai gi hulo gee denga huaahenua mai i daho oo dangada, go gilaadeu aau ne hagaola mai i Egypt?

<sup>22</sup> Koe ne hai Israel go oo dangada donu ga hano ai. Gai koe, TAGI MAOLUNGA, gu hai go delaadeu Maadua.

<sup>23</sup> Deelaa ai, TAGI MAOLUNGA, hagassula ina au muna gu tala i dagodo o doo dangada hai hegau aama dono huaabodu, ma de hai gi bei au muna gu tala,

<sup>24</sup> gi makaga ai de nohoanga hodoologi gai doo ingoo gi hagaamua ga hano ai. Gai dangada e hagataba naa, ‘TAGI o denga hagabuulinga hebagi, de Maadua e dagina Israel, go de Maadua o Israel.’ Gai de nohoanga hodoologi o doo dangada hai hegau go David e duu naa ga makaga i mada luoo mada.

<sup>25</sup> Dogu Maadua, koe gu hagaago mai gi de au, doo dangada hai hegau, bolo koe e hai gi dahi ogu hale. Deenei ai, doo dangada hai hegau e lodo mmahi donu i de dalodalo adu gi de goe.

<sup>26</sup> TAGI MAOLUNGA, go koe de Maadua abodonu! Koe gu hagatoo donu mai gi de au, doo dangada hai hegau, de mee danuaa nei.

<sup>27</sup> Gai koe ne malangilangi i de hagamanuuia de huaabodu o doo dangada hai hegau, gai gi

nnoho ai gimaadeu i mada luoo mada ga hano ai. TAGI MAOLUNGA, koe gu lava i de hagamanuuia gimaadeu, gai e manuuia naa donu ga hano ai.”

## 18

### *Hanonga o David ne kii ai i de hebagi (2 Sa 8.1-14)*

<sup>1</sup> Dua mee nei gai David ne hagadee kii de gau Philistia ga hai gilaadeu gi nnoho i ono lalo, gai ia ga kave Gath ma ono aduhale vaaligiligi mai i daho de gau Philistia.

<sup>2</sup> Ia ne hagadee kii hogi de gau Moab, gai gilaadeu gu hai hegau ange gi David ma de hagao ange taagisese gi de ia.

<sup>3</sup> David ne hagadee kii hogi Hadadezer, de hodoologi o Zobah, ga hano ai loo ga dae gi Hamath, i de masavaa a Hadadezer ne hano ai e hai gi dagodo dono sauua i mommee i gaogao ssaalingaa vai go Euphrates.

<sup>4</sup> Gai David ne kave mai i ono daha e mano hada hebagi, ma e hidumano daane e saavini i hongga hoosa, ma e luasemada daane hebagi. Ia ne hai hogi gi dee vaa seese dengga hoosa alodahi, gai ne dugu e lau hoosa ange gi dengga hada.

<sup>5</sup> Gai de gau Syria i Damascus ne loomai e bale ange Hadadezer, de hodoologi o Zobah, gai David ne daa hogi ga maakau e 22,000 olaadeu daane.

<sup>6</sup> Gai ia ne dugu hanu daane hebagi i Syria o Damascus, gai de gau Syria gu hai hegau ange gi de ia, ma de hagao ange taagisese gi de ia. Gai TAGI MAOLUNGA ne hai gi kii David i mommee alodahi oona ne hano aagena.

<sup>7</sup> Gai David ne gaamai denga mee hungihungi goolo a denga dagi i lalo o Hadadezer gi Jerusalem.

<sup>8</sup> Gai David ne kave hoga hana *bronze* lagolago mmao mai i luu aduhale o Hadadezer, go Tibhath ma Cun. Aanei *bronze* a Solomon ne hai ai taaba laumalie, ma denga duludulu, aama golea e hai i *bronze*.\*

<sup>9</sup> De masavaa huu a Tou, de hodoologi o Hamath, ne langona ai bolo David gu hagadee kii de hagabuulinga hebagi alodahi o Hadadezer, de hodoologi o Zobah,

<sup>10</sup> gai ia ga hai gi hano dana dama daane go Hadoram gi daho de hodoologi go David, gi haga-boo ange gi de ia, ma de tuhi ia i hiidinga dono hebagi ange gi Hadadezer ga hagadee kii ia; go hiidinga Hadadezer e dee modu donu de hebagi ange gi Tou. Gai Hadoram ne gaamai gi de ia denga hagadaangaa golea selevaa, ma goolo, aama *bronze*.

<sup>11</sup> Gai de hodoologi go David ne hagadabu ange golea nei gi TAGI MAOLUNGA, madali denga selevaa ma goolo aana ne kave mai i denga huaahenua: go Edom, ma Moab, ma de gau Ammon, ma de gau Philistia, aama Amalek.

<sup>12</sup> Gai Abishai tama daane a Zeruah ne daa ga maakau e 18,000 daane Edom i de Geelonga o denga Soolo.\*

<sup>13</sup> Gai David ne kave hana daane hebagi gi nnoho i Edom, gai de gau Edom alodahi gu hai hegau ange gi David. Gai TAGI MAOLUNGA ne hai

---

\* **18:8** 1 Ki 7.40-47; 2 Ch 4.11-18      \* **18:12** Psa 60.1

gi kii David i de hebagi i mommee alodahi oona e hano aagena.

*Denga dagi i lalo o David*

*(2 Sa 8.15-18)*

<sup>14</sup> Gai David ne hodoologi i hongia Israel alodahi, gai ia ne hagamodu i de soe ma de mee heohi ange gi ono dangada alodahi.

<sup>15</sup> Gai Joab, tama daane a Zeruah, go tagi o denga daane hebagi; gai Jehoshaphat, tama daane a Ahilud, go tangada daohi;

<sup>16</sup> Zadok, tama daane a Ahitub, ma Ahimelek, tama daane a Abiathar, go luu dangada haimeed-abu; gai Shavsha go tangada sisi;

<sup>17</sup> gai Benaiah, tama daane a Jehoiada, go tagi o de gau Kereth ma de gau Peleth; gai dama daane a David go dagi aamua e haia hegau a de hodoologi.

## 19

*De hagadee kii a David de gau Ammon*

*(2 Sa 10.1-19)*

<sup>1</sup> Dua mee nei gai Nahash, de hodoologi o de gau Ammon gu magau, gai dana dama daane ga sui ia ga hodoologi ai.

<sup>2</sup> Gai David ne hagadaba, “Au ga abodonu ange nei gi Hanun, tama daane a Nahash, go hiidinga dono damana ne abodonu mai gi de au.” Gai David ne hai hanu daane gi hulo gi hagaaneane ina ono lodo i hiidinga de magau o dono damana.

De masavaa o denga daane hai hegau o David ne tae ai gi daho Hanun i de henua o de gau Ammon e hagaaneane ai ia,

<sup>3</sup> gai dagi o de gau Ammon ne hai ange gi Hanun, “E aha, koe e maanadu bolo David ne hai gi loomai ono daane gi hagaaneane ina oo lodo, e hagamubu ai doo damana? E aha, ono daane hai hegau tee se loomai nei e tilo dagodo ma de mulidagi de henua, gi maua ai e ia i de hagadee kii de henua?”

<sup>4</sup> Gai Hanun ne kave denga daane hai hegau o David ga dahi olaadeu gumigumi, aama de duuduu bido i lalo olaadeu malo gu ssula mai olaadeu dae, ga hai gilaadeu gi hulo.

<sup>5</sup> Gai ga langona huu e David mee gu hai ange gi denga daane laa, gai ia ga hai hanu gi hulo gi hedae ange gi gilaadeu, go hiidinga gilaadeu gu dookaa mmao. Gai de hodooligi ne aalu ga hai ange, “Goodou nnoho i Jericho ga dae ai gi de ssomo mai huluhulu i oodou gumigumi, gai goodou ga aahe mai ai.”

<sup>6</sup> Gai ga gidee huu e de gau Ammon bolo David gu kino i gilaadeu, gai Hanun ma de gau Ammon ga kave e mano *talent*\* selevaa e hagao ai denga hada hebagi ma denga daane e kage i hongha hoosa mai i Mesopotamia,† ma mai i Syria Maacah aama Zobah.

<sup>7</sup> Gilaadeu ne hagao e 32,000 hada hebagi, aama de hodooligi go Maacah ma ono daane hebagi, ga hai gilaadeu gi loomai gi nnoho gaalinga i gaogao Medeba. Gai de gau Ammon ne hagabuni mai hogi dangada i lodo olaadeu aduhale e hulo gi de hebagi.

<sup>8</sup> Gai ga langona huu e David, gai ia ga hai a

---

\* **19:6** 1,000 *talente* bei se 37 dana. † **19:6** *Mesopotamia*: de Beebaa Hebrew go *Aram Naharaim*.

Joab ma de hagabuulinga o denga daane mmahi alodahi gi hebagi ange gi gilaadeu.

<sup>9</sup> Gai de gau Ammon ne loomai ga hagatau e hebagi i gaogao de haitoga o de aduhale; gai denga hodoologi ange laa ne hagatau hogi i tua de aduhale.

<sup>10</sup> Gai ga gidee huu e Joab bolo denga daane hebagi gu hagatau i ono dua ma ono mada i mua, gai ia ga hili hanu daane dau o Israel, ga hagatau gilaadeu gi hebagi ange gi de gau Syria.

<sup>11</sup> Gai ia ne dugu ange denga daane e doe gi dono daina go Abishai gi dagina, ma de hagatau gilaadeu gi hebagi ange gi de gau Ammon.

<sup>12</sup> Gai ia ga hai ange, “Noo de gau Syria gu mmahi ange i de au, gai koe humai balea mai au; aagai noo de gau Ammon gu mmahi ange i de goe, gai au ga hanadu ga bale adu goe.

<sup>13</sup> Koe gi lo taane, gai gidaadeu ga hagamahi e hebagi, i hiidinga odaadeu dangada, aama denga aduhale o taadeu Maadua. Gai TAGI MAOLUNGA e hai naa be se aha e danuaa i mada luono mada.”

<sup>14</sup> Gai a Joab ma denga daane madali ia ne hulo ga hebagi ange gi de gau Syria, gai de gau Syria ga saavini ga hulo gee mai i de ia.

<sup>15</sup> Gai ga gidee huu e de gau Ammon bolo de gau Syria gu saavini ma gu hulo gee, gai gilaadeu ga saavini hogi ga hulo gee mai i Abishai, taina daane o Joab, ga ulu gi lo te aduhale. Gai a Joab ga ahe gi Jerusalem.

<sup>16</sup> Aagai ga gidee huu e de gau Syria bolo gu kii de gau Israel i gilaadeu, gai gilaadeu ga kave hanu daane gi haia gi loomai denga daane Syria i de

baasi gee o Euphrates, gai go Shophak, tagi o de hagabuulinga hebagi o Hadadezer, delaadeu dagi.

<sup>17</sup> Gai ga langona huu e David mee laa, gai ia ga hagabuni denga daane alodahi o Israel, ga hulo gi baasi dua o Jordan. Gai David ga hagatau ono daane e hebagi ange ai gi de gau Syria, gai gilaadeu ga hebagi ange gi de ia.

<sup>18</sup> Aagai de gau Syria ne saavini ga hulo gee mai i de gau Israel, gai David ne daa e hidumano daane i hongga denga hada hebagi, ma e haasemada daane hebagi e seese laa. Ia ne daa hogi ga magau Shophak, tagi o denga daane hebagi o Syria.

<sup>19</sup> De masavaa huu o de gau hai hegau o Hadadezer ne gidee ai bolo de gau Israel gu hagadee kii gilaadeu, gai gilaadeu ga hagianuaa olaadeu magavaa ma David, ga hai hegau ange gi de ia.

Gai de gau Syria gu dee llodo e bale ange de gau Ammon.

## 20

### *De hagadee kii o Rabbah*

*(2 Sa 12.26-31)*

<sup>1</sup> De masavaa o de matili age, go de masavaa o denga hooligi e hulo ai e hebagi, gai a Joab ne kave denga daane hebagi ga hulo gi de hebagi. Gai gilaadeu ne hulo ga oha de henua o de gau Ammon, gai gilaadeu ne duuli luu baasi de aduhale go Rabbah. Aagai David e noho i Jerusalem. Gai a Joab ne hebagi ga hagadee kii ma de oha de aduhale go Rabbah.\*

---

\* **20:1** 2 Sa 11.1

<sup>2</sup> Gai David ne kave gee de hau i hongaa de biho o delaadeu hodoooligi,\* gai taemaha o de hau laa se dahi *talent*† goolo, gai e hagalaagii i hadu hag-amogomogo, gai de hau laa gu gaavange gi hongaa de biho o David. Gai ne lagolago ana goloa ne kave gee mai i de aduhale laa.

<sup>3</sup> Gai ia ne kave dangada i de aduhale laa, ga hagahai hegau gilaadeu i denga soaa ma piigi *iron* aama denga hagadaguu. Deenei de hai a David ne hai ai dangada i denga aduhale alodahi o de gau Ammon. Gai David ma dono hagabuulinga hebagi alodahi ne aahe gi Jerusalem.

*De daa ga maakau o denga doa*  
(2 Sa 21.15-22)

<sup>4</sup> Dua mee laa gai gilaadeu ne hebagi ange hogi gi de gau Philistia i Gezer; gai Sibbecai, taane Hushah, ne daa Sippai, dahi daane mai i de aamuli o denga doa, gai de gau Philistia tee maua gi kii.

<sup>5</sup> Gai gilaadeu ne aahe ange hogi ga hebagi ange gi de gau Philistia, gai Elhanan, tama daane a Jair, ne daa ga magau Lahmi, taina daane o Goliath taane Gath. Gai de gau o dono dao e laumalie bei de laagau o de mee llanga malo.\*

<sup>6</sup> Gai gu hai ange hogi de hebagi i Gath; gai e dahi doa i kilaa e ono ono madannia ma dabuvae, se madalua ma haa alodahi ono madannia ma dabuvae. Ia se daane hogi mai i de aamuli o Rapha.‡

---

\* **20:2** *delaadeu hodoooligi*, aabe go *Milcom* (e bei go Molek).

† **20:2** *dahi talente* bei se 75 pauni. \* **20:5** 1 Sa 17.4-7 ‡ **20:6** *Rapha*, aabe go *denga doa*.

<sup>7</sup> Ia ne basa hagamaolunga i de gau Israel, gai Jonathan, tama daane a Shimea, taina daane o David, ga daa ia gu magau.

<sup>8</sup> Denga daane nei ni daane mai i de aamuli o denga doa i Gath; gai David ma ono daane ne daa gilaadeu ga maakau.

## 21

### *De dau o denga daane hebagi (2 Sa 24.1-17)*

<sup>1</sup> Gai Satan ne hai baasi ange gi de gau Israel, ga hai David gi daulia de gau Israel.

<sup>2</sup> Gai David ne hai ange gi Joab ma dahi o denga daane hebagi, “Goodou hulo daulia dangada alo-dahi o Israel mai i Dan ga dae ai gi Beersheba, gi iloo ai e au taelodo o dangada.”

<sup>3</sup> Aagai a Joab ne hai ange gi de hodoologi, “TAGI MAOLUNGA gi haia gi soa ange ono dangada i e lau hanonga. Dogu dangada aamua go de hodoologi, e aha, denga daane nei alodahi e dee nnoho i oo lalo? Gai gu aha gu lodo ai naa goe e hai de hegau nei e hagahaisala ai de gau Israel?”

<sup>4</sup> Aagai gu kii muna a de hodoologi i muna a Joab, gai Joab ne hano ga hagadaga i Israel, muli mai gai ia ne aahe mai gi Jerusalem.

<sup>5</sup> Gai Joab ne tala ange gi David taelodo o denga daane hebagi; gai se 1,100,000 daane o Israel e hebagi i de gadilaasa, madali e 470,000 daane o Judah.

<sup>6</sup> Aagai a Joab tee dau denga daane i de aamuli o Levi ma Benjamin, go hiidinga ia tee buni ange gi muna a de hodoologi.

7 Gai de Maadua tee malangilangi i de mee laa; gai ia ne hagaduasala de gau Israel.

8 Gai David ne hai ange gi de Maadua, “Au gu haisala mmao i dagu hai de hegau nei. Aagai iainei, au e dangidangi adu, degi mai gi de au, doo dangada hai hegau; go hiidinga au ne lodo senga.”

9 Gai TAGI MAOLUNGA ga hai ange gi Gad, taane hai hegau o David e daalaa mee e loomai,

10 “Hannoo hai ange gi David, ‘E hagadaba TAGI MAOLUNGA: Au e gaavadu gi de goe e dolu mee; hilihilia dahi mee nei, gai au ga hagaduasala ai goe.’”

11 Gai Gad ne humai gi daho David, ga hai ange, “E hagadaba TAGI MAOLUNGA, ‘Hilihilia dahi mee i mee e dolu nei:

12 go de onge i e dolu ngadau, be go de loomai o oo hagadaumee gi oohaa de henua, gai de gadi-laasa a oo hagadaumee gi dolohia goe gi daea, aabe go de gaamai de gadilaasa a TAGI MAOLUNGA i e dolu laangi – go dahi mee hagamaakau gi hongga de henua, gai tangada de langi o TAGI MAOLUNGA gi daa gi maakau dangada i mommee o Israel alodahi.’ Deenei ai, hilihilia be dee hee dagu hai e basa ange ai gi de ia ne haia nei au gi humai.”

13 Gai David ne hai ange gi a Gad, “Au gu duu ange gi dahi hai ngadaa laumalie. Au e dugu ange au gi TAGI MAOLUNGA gi hagaduasala ina, go hiidinga dono lodo aloha e laumalie mmao; aagai au gi dee hagaduasala i daho dahi dangada.”

14 Gai TAGI MAOLUNGA ga hai gi humai dahi mee hagamaakau gi Israel, gai se hidusemada dangada ne maakau i kilaa.

15 Gai de Maadua ne hai gi humai dahi dangada de langi gi daia gi maakau dangada i Jerusalem; aagai de masavaa a tangada de langi ne daamada ai de daa dangada, gai TAGI MAOLUNGA gu gidee, gai ia gu sui dono lodo e hai de baubau laa, gai ia ga hai ange gi tangada de langi e daia laa dangada, “Gu lava, dugua iho doo lima!” De masavaa laa gai tangada de langi o TAGI MAOLUNGA gu duu i gaogao de mommee hili huamanu o Araunah,\* taane Jebus.

16 Gai David ne galo age ga gidee e ia tangada de langi o TAGI MAOLUNGA e duu i lo te moana i lunga i magavaa de langi ma henua i lalo, gai ia e poo dana gadilaasa i lo tono lima ma e daohi ange gi hongga o Jerusalem. Gai David ma denga dagi gu kahu laa i denga malo daladala ga ino gi lalo i hongga de gelegele.

17 Gai David ga hai ange gi de Maadua, “E aha, e dee go au ne hai ange gi denga daane gi daulia dangada? Go au donu ne haisala i dagu hai de hegau dee heohi nei. Gai de gau nei e bei donu dagodo o denga ssiibi, ni aha alaadeu ne hai? TAGI MAOLUNGA, dogu Maadua, au e dangidangi adu koe gi hagaduasala ina gimaadeu ma dogu huabodu, gai koe aude gaamai de mee hagamaakau nei gi hongga oo dangada.”

*De hagaduu de mommee o ssigidaumaha  
(2 Sa 24.18-25)*

18 Gai tangada de langi o TAGI MAOLUNGA ga hai a Gad gi hai ange gi David, ia gi hano gi hagaduulia

---

\* **21:15 Araunah:** de Beebaa Hebrew e hai ange bolo go *Ornan*, go dahi ingoo ange o Araunah; diiloo hogi denga gubu e 18-28.

dahi mommee o ssigidaumaha ange gi TAGI MAOLUNGA, i de mommee hili huamanu o Araunah, taane Jebus.

<sup>19</sup> Gai David ne hano ga hai gu bei muna a Gad gu tala i de ingoo o TAGI MAOLUNGA.

<sup>20</sup> De masavaa o Araunah e noho ai ma e hili ana *grain*, gai ia ne gidee tangada de langi laa; gai ana dama daane dogohaa gu hulo ga hulo ga mmuni.

<sup>21</sup> Gai de masavaa o David ne humai ai, gai Araunah gu gidee adu ia, gai ia ga seese adu i de mommee hili huamanu, ga ino luono mada gi hongga de gelele i mada i mua o David.

<sup>22</sup> Gai David ga hai ange gi de ia, “Gaamai gi de au doo mommee hili huamanu, gai au ga hagaduu ai dahi mommee o ssigidaumaha ange gi TAGI MAOLUNGA, e hai ai gi tuu de mee hagamaakau i daho dangada. Hagao ina mai doo mommee hili huamanu i dono hagaoanga donu.”

<sup>23</sup> Gai Araunah ga hai ange gi David, “Gaavee mee naa, ga hai ai be ni aha a de hooligi e lodo ai. Tilo, au e gaavadu naa hogi denga kaau e hai ai denga sigidaumaha dudu, ma baabaa iai mee duuduu *grain* e hai ai de ahi, aama *grain* e hai ai ssigidaumaha o *grain*. Au e gaavadu mee nei alodahi.”

<sup>24</sup> Aagai de hooligi go David ne hai ange gi Araunah, “E deai, au e hagao donu gi odi ange de hagaoanga o de mommee nei; au e dee maua donu i de ngadi kave au mee e gaavange gi TAGI MAOLUNGA, au e dee hai dagu ssigidaumaha dudu i mee oogu tee too ange aagena.”

<sup>25</sup> Gai David ne hagao de mommee o Araunah i e onolau *shekel*<sup>†</sup> goolo.

<sup>26</sup> Gai David ga hagaduu dahi mommee o ssigidaumaha ange gi TAGI MAOLUNGA i kilaa, ga hai ai denga sigidaumaha dudu ma sigidaumaha hagdauaa magavaa. Gai ia ga dalodalo ange gi TAGI MAOLUNGA, gai TAGI MAOLUNGA ga basa ange gi dana dangidangi, ga hai gi hano iho de ahi mai i de langi gi duungia ssigidaumaha dudu laa.

<sup>27</sup> Gai TAGI MAOLUNGA ga basa ange gi tangada de langi laa, gai ia ga hagahe ange dana gadilaasa gi lo tono hale.

<sup>28</sup> De masavaa a David ne gidee ai bolo TAGI MAOLUNGA ne basa ange gi de ia i de mommee hili huamanu o Araunah, taane Jebus, gai ia ga hai denga sigidaumaha i kilaa.

<sup>29</sup> Gai de *tabernacle* o TAGI MAOLUNGA a Moses ne hai laa i de vao, ma de mommee o ssigidaumaha dudu e daakodo i de mommee daumaha i Gibeon, i de masavaa laa.

<sup>30</sup> Aagai David tee maua i de hano gi kilaa e dalodalo ange ai gi de Maadua, go hiidinga ia gu madagu i de gadilaasa a tangada de langi o TAGI MAOLUNGA.

## 22

<sup>1</sup> Gai David ne hagadaba, “Deenei de mommee e hagaduu ai de hale o TAGI MAOLUNGA de Maadua, ma de mommee e hai ai sigidaumaha dudu a de gau Israel.”

### *De hagadabena e hagaduu age de temple*

---

<sup>†</sup> **21:25** 600 *shekele* bei se 15 pauni.

<sup>2</sup> Gai David ne hai gi hagabuni ina de gau henua gee e nnoho i Israel, gai ia ga hili hanu gilaadeu gi duuduu ina hadu ga hagamalali e hai ai de hale o de Maadua.

<sup>3</sup> David ne hai hogi denga *iron* lagolago e hai ai denga neele e hai ai denga abaaba o denga haitoga ma mee hagamakaga, aama denga *bronze* lagolago mmao, tee maua i de hagahidi gi iloo taemaha.

<sup>4</sup> Ia ne hai hogi denga laagau *cedar* ga lagolago mmao; go hiidinga de gau Sidon ma de gau Tyre ne gaamai denga laagau *cedar* lagolago gi David.

<sup>5</sup> Gai David ne hagadaba, “Dagu dama daane go Solomon goi gauligi huu, gai tigi madua dana maanadu, gai de hale o TAGI MAOLUNGA aana e hagaduu e hai gi se hale mahamaha mmao, gi langona ai e denga huaahenua alodahi dagodo o de hale nei aama dono mahamaha. Gai au e hagadabena naa mee alodahi e hai ai.” Gai David ne hagadabena denga golea lagolago mmao i mua dono magau.

<sup>6</sup> Gai ia ga hagahi dana dama go Solomon, ga hai ange ia gi hagaduulia dahi hale e hagadubu ai de ingoo o TAGI MAOLUNGA, de Maadua o Israel.

<sup>7</sup> Gai David ne hai ange gi Solomon, “Dagu dama, au ne lodo e hagaduu dahi hale e hagadubu ai de ingoo o TAGI MAOLUNGA, dogu Maadua.\*

<sup>8</sup> Aagai TAGI MAOLUNGA ne hagaago mai ana muna gi de au, ga hai mai, ‘Koe gu lagolago au dangada ne daa ga maakau, aama de hai denga hebagi nnui; deelaai, koe e dee maua i de hagaduu dahi hale e hagadubu ai dogu ingoo, go hiidinga gu

---

\* 22:7 2 Sa 7.1-16; 1 Ch 17.1-14

kona de soa au dangada ne daa ga maakau i henua i lalo.

<sup>9</sup> Tilo, koe e hagadili naa dahi dama daane; ia e haia gi nnoho paba dangada ma de duadonu. Gai au e hai naa gi mabu ia i de hebagi ange gi hagadaumee alodahi i luu baasi dono henua. Gai ia e hagingoo ange naa go Solomon.\* Au e hai naa gi nnoho paba dangada ma de malino hongga de henua go Israel i de masavaa oona e hodoologi ai.

<sup>10</sup> Ia e hagaduu naa dahi hale e hagadubu ai dogu ingoo. Ia go dagu dama, gai au go dono damana. Au e hai naa dono nohoanga hodoologi i Israel gi dagodo ga hano ai.’

<sup>11</sup> Deenei ai, dagu dama, TAGI MAOLUNGA gi noho madali goe, gi maua ai e goe i de hagaduu de hale o TAGI MAOLUNGA doo Maadua, bei dana hai gu tala ai.

<sup>12</sup> Gai TAGI MAOLUNGA gi haia goe gi maanetonu ma de iloo mee, gai koe ga daohi ai de hainga a TAGI MAOLUNGA doo Maadua i de masavaa aana e hai ai goe gi hodoologi i Israel.

<sup>13</sup> Gai koe e hagadagadaga age naa, noo koe e daohi mee a TAGI MAOLUNGA gu hagasauaa ma de hagamodu ange gi Moses, ia gi gaavange gi de gau Israel. Koe gi lodo mmahi ma de lo taane. Aude madagu aabe gi baageaa oo lodo.\*

<sup>14</sup> Gai au ne hagaduu ngae ga hagadabena mee e hai ai de hale o TAGI MAOLUNGA: e dahiseguli *talent*<sup>†</sup> goolo, ma e dahiseloo *talent*<sup>‡</sup> selevaa, ma

---

\* **22:9** Solomon ne humai i de muna Hebrew go de nnoho paba.

\* **22:13** Josh 1.6-9 † **22:14** 100,000 talente bei se 3,750 dana.

‡ **22:14** 1,000,000 talente bei se 37,500 dana.

*bronze* ma *iron* lagolago mmao tee maua i de hagahidi gi iloo taemaha, ma laagau aama hadu. Gai koe haia ange hanu e hagapuni ange gi mee nei.

<sup>15</sup> Gai gu soa hogi oo dangada hai hegau e duuduudia hadu, ma labagau o denga hadu ma laagau, aama denga hagadaangaa labagau soa

<sup>16</sup> e hai hegau i denga goolo, ma selevaa, ma *bronze*, aama *iron*. Haia de hegau nei! Gai TAGI MAOLUNGA gi noho madali goe.”

<sup>17</sup> David ne hai ange hogi gi dagi alodahi o Israel, gilaadeu gi balea ange dana dama, go Solomon, ga hai ange,

<sup>18</sup> “E aha, TAGI MAOLUNGA doodou Maadua e dee noho nei madali goodou? Ia tee hai laa gi nnoho paba goodou madali dangada i luu baasi de henua? Ia ne dugu mai au gi hagadee kii ina dangada nogo nnoho i de henua. Gai de henua gu hai hegau ange gi TAGI MAOLUNGA ma ono dangada.

<sup>19</sup> Gai goodou hagammahi saalaa TAGI MAOLUNGA doodou Maadua i oodou lodo ma oodou hagasaalunga alodahi. Goodou ga daamada de hagaduu de mommee dabu o TAGI MAOLUNGA de Maadua, gi maua ai e goodou i de gaamai de ngavesi o de hagatoo donu hagaheloongi a TAGI MAOLUNGA ma denga golea dabu o de Maadua gi lo te *temple* oodou e hagaduu ange gi de ingoo o TAGI MAOLUNGA.”

## 23

*De aamuli o Levi*

<sup>1</sup> De masavaa o David ne madumadua ai, gai ia ne hai dana dama daane go Solomon gi hodoologi i Israel.\*

<sup>2</sup> Ia ne hagabuni denga dagi alodahi o Israel ma de gau haimeedabu aama denga daane de aamuli o Levi.

<sup>3</sup> Gai gilaadeu ne dau denga daane de aamuli o Levi gu dagimatolu laa olaadeu ngadau ga hanage ai, gai taelodo alodahi se 38,000.

<sup>4</sup> Gai David ga hai ange, “E 24,000 mai i denga daane nei gi hagaseese inahogau i de hale o TAGI MAOLUNGA, gai e onomano e hai gi ni dagi ma de gau hagamodu muna;

<sup>5</sup> e haamano e hai gi ni daane hagaloosi haitoga, gai e haamano gi duuhia TAGI MAOLUNGA ma de hagadangidangi i denga mee hagadangidangi aagu gu lava i de hagadabena ange e daahili tuhi ai.”

<sup>6</sup> Gai David ne hai e dolu hagabuilinga i denga huaabodu o de aamuli o Levi, mai de hagadiilinga o Gershon, ma de hagadiilinga o Kohath, aama de hagadiilinga o Merari.

<sup>7</sup> Denga daane de hagadiilinga o Gershon: go Ladan ma Shimei.

<sup>8</sup> Dama daane a Ladan: Jehiel go tama madua, ma Zetham aama Joel — e dogodolu gilaadeu.

<sup>9</sup> (Dama daane a Shimei: go Shelomoth, ma Hazieli, aama Haran — e dogodolu gilaadeu.)

Aanei dagi o denga hagadiilinga o Ladan.

<sup>10</sup> Gai dama daane a Shimei: go Jahath, ma Zina, ma Jeush aama Beriah.

---

\* 23:1 1 Ki 1.1-40

Aanei dama daane a Shimei – se dogohaa gilaadeu.

11 Tama madua go Jahath, togolua go Zizah, aagai Jeush ma Beriah ne sogoisi donu alaau dama daane; deelaai, gilaadeu ne daudonu huu bolo se dahi huaabodu.

12 Dama daane a Kohath: go Amram, ma Izhar, ma Hebron, aama Uzziel, se dogohaa gilaadeu.

13 Dama daane a Amram: go Aaron ma Moses. Gai Aaron ma dono aamuli alodahi ne vvae gee gi hagadabu ina denga mee dabu mmao, ma de hai denga sigidaumaha i mada luu mada o TAGI MAOLUNGA, ma de hai hegau i ono mada i mua, aama de hagamauuia ai dangada i dono ingoo ga hano ai.\*

14 Aagai dama daane a Moses, taane o de Maadua, ne sisi olaadeu ingoo madali de aamuli o Levi.

15 Dama daane a Moses: go Gershom ma Eliezer.

16 Dama daane a Gershom: Shebuel go tama madua.

17 Dama daane a Eliezer: Rehabiah go tama madua. Gai Eliezer teai ange donu ana dama, aagai Rehabiah ne soa donu ana dama.

18 Dama daane a Izhar: Shelomith go tama madua.

19 Dama daane a Hebron: Jeriah go tama madua, togolua go Amariah, togodolu go Jahaziel, gai togohaa go Jekameam.

20 Dama daane a Uzziel: Micah go tama madua, gai Isshiah go togolua.

---

\* 23:13 Exo 28.1

21 Dama daane a Merari: go Mahli, ma Mushi.

Dama daane a Mahli: go Eleazar ma Kish.

22 Gai Eleazar teai donu ana dama daane; ni damaa hine donu huu aana. Gai denga dama daane a dono daina daane go Kish ne hai bodu ange gi ana damaa hine.

23 Dama daane a Mushi: go Mahli, ma Eder, aama Jeremoth — se dogodolu gilaadeu.

24 Aanei hagadiilinga o de aamuli o Levi; dagi o denga huaabodu ne sisi olaadeu ingoo bei taelodo o de ingoo o tangada, go dangada e dagimadalua olaadeu ngadau ga hanage ai, aanei gilaadeu e haia hegau i lo te o TAGI MAOLUNGA.

25 Gai David ne hagadaba, “Go hiidinga TAGI MAOLUNGA, de Maadua o Israel gu hai gi nnoho paba ono dangada gai ia gu humai e noho i Jerusalem ga hano ai,

26 deelaai, denga hagadiilinga o Levi gu dee hagauda saele de *tabernacle* ma goloa alodahi e hai ai ono hegau.”\*

27 Gai denga daane de aamuli o Levi ne dau mai i de madalua ngadau ga hanage ai, bei de hai a David gu tala ange ai.

28 Gai delaadeu hegau go de bale ange dama daane a Aaron i hegau o de hale o TAGI MAOLUNGA; gilaadeu e tilo ange mee i lo te buibui ma lodo aabi, aama de hagagilimalali denga goloa dabu alodahi, ma hegau e hai i de hale o de Maadua ange laa.\*

29 Gilaadeu e balea de hai denga pelaoa dabu, ma pelaoa mada e hai ai ssigidaumaha o *grain*,

---

\* 23:26 Deut 10.8      \* 23:28 Num 3.5-9

ma besgede e deai mee hagahua iai, ma mee e dao e hai ai ssigidaumaha, ma ssigidaumaha e hilo ma lolo *olive*, gai mee alodahi ne hagahidi ma de haide.

<sup>30</sup> Gai gilaadeu gi tuu i daiiao ma ahiahi alodahi gi hagahe ange de abodonu ma de tuhi gi TAGI MAOLUNGA,

<sup>31</sup> ma masavaa alodahi e hai ai denga sigidaumaha dudu a TAGI MAOLUNGA i denga Sabbath, ma de masavaa e duu ai de maasina i dai, aama denga laangi daonga gu lava i de hagailonga. Gilaadeu e hai donu gi odi ange taelodo gu hagamodu ange gi gilaadeu ga hano ai, i mada luu mada o TAGI MAOLUNGA.

<sup>32</sup> Gai go aamuli o Levi ne hai denga hegau i de hale malo hagabuni ma de mommee dabu, aama de bale ange olaadeu dangada go dama daane a Aaron, e hai ai hegau i de hale o TAGI MAOLUNGA.

## 24

### *Vaevaaenga o de gau haimeedabu*

<sup>1</sup> Aanei denga hagabuulinga i de aamuli o Aaron:

Dama daane a Aaron: go Nadab, ma Abihu, ma Eleazar, aama Ithamar.

<sup>2</sup> Aagai Nadab ma Abihu ne maakau i mua o delaau damana, gai teai donu alaaui dama daane; gai Eleazar ma Ithamar ne sui gilaau ga hai ai hegau a de gau haimeedabu.\*

<sup>3</sup> Gai David ma Zadok, dahi aamuli o Eleazar, aama Ahimelek, dahi aamuli o Ithamar, ne hagadau bale ga vaevae ai de gau nei ga gaavange alaadeu hegau e hai.

---

\* 24:2 Lev 10.1-2

<sup>4</sup> Gai ne soa ange dagi ne gidee mai i magavaa o hagadiilinga o Eleazar, i dagi mai i hagadiilinga o Ithamar. Gai deenei de hai ne vaevae ai gilaadeu: e dinoangahulu ma dogoono dagi mai i denga huaabodu o Eleazar, gai e dogovalu dagi mai i denga huaabodu o Ithamar.

<sup>5</sup> Gai gilaadeu ne vaevae i de dada; go hiidinga hanu gilaadeu ni dagi niio de hale dabu ma dagi ange gi de Maadua mai hagadiilinga o Eleazar aama Ithamar.

<sup>6</sup> Gai tangada sisi go Shemaiah, tama daane a Nethanel, ia se hagadiilinga niio Levi, ia ne sisi ga daohi olaadeu ingoo i mada i mua o de hodooligi, ma dagi o de henua – tangada haimeedabu go Zadok, ma Ahimelek tama daane a Abiathar, aama dagi o denga huaabodu o de gau haimeedabu ma de aamuli o Levi – dahi mai i de hagadiilinga o Eleazar, gai e dahi mai de hagadiilinga o Ithamar.

<sup>7</sup> Taane ne dada i mua go Jehoiarib,  
togolua go Jedaiah,

<sup>8</sup> togodolu go Harim,  
togohaa go Seorim,

<sup>9</sup> togolima go Malkijah,  
togoono go Mijamin,

<sup>10</sup> togohidu go Hakkoz,  
togovalu go Abijah,

<sup>11</sup> togosiva go Jeshua,  
tinoangahulu go Shecaniah,

<sup>12</sup> tinoangahulu ma dogodahi go Eliashib,  
tinoangahulu ma dogolua go Jakim,

<sup>13</sup> tinoangahulu ma dogodolu go Huppah,  
tinoangahulu ma dogohaa go Jeshebeab,

- 14 tinoangahulu ma dogolima go Bilgah,  
 tinoangahulu ma dogoono go Immer,  
 15 tinoangahulu ma dogohidu go Hezir,  
 tinoangahulu ma dogovalu go Happizzesz,  
 16 tinoangahulu ma dogosiva go Pethahiah,  
 tinolua go Jehezkel,  
 17 tinolua ma dogodahi go Jakin,  
 tinolua ma dogolua go Gamul,  
 18 tinolua ma dogodolu go Delaiah,  
 gai tinolua ma dogohaa go Maaziah.

19 Aanei olaadeu hagabuulinga hai hegau i de masavaa olaadeu e ulu ai i de hale o TAGI MAOL-UNGA, bei dagodo o denga hainga gu hagamodu ange ai gi gilaadeu i daho delaadeu dubuna go Aaron, bei de hai a TAGI MAOLUNGA, de Maadua o Israel gu tala ange ai gi de ia.

*Hanu hagadiilinga o Levi*

- 20 Gai de gau e doe i de aamuli o Levi:  
 mai i dama a Amram: go Shebuel;  
 mai i dama a Shubael: go Jehdeiah.  
 21 Gai mai i hagadiilinga o Rehabiah: Isshiah go tama madua.  
 22 Mai i hagadiilinga o Izhar: go Shelomoth;  
 mai i dama daane a Shelomoth: go Jahath.  
 23 Mai i dama daane a Hebron: Jeriah go tama madua, togolua go Amariah, togodolu go Jahaziel, gai togohaa go Jekameam.  
 24 Mai i dama daane a Uzziel: go Micah;  
 mai i dama daane a Micah: go Shamir.  
 25 Gai taina daane o Micah: go Isshiah;  
 mai i dama daane a Isshiah: go Zechariah.  
 26 Dama daane a Merari: go Mahli ma Mushi;

mai i dama daane a Jaaziah, go Beno.

<sup>27</sup> Mai i dama a Merari: go Jaaziah ma Beno, ma Shoham, ma Zaccur aama Ibri.

<sup>28</sup> Mai i dama daane a Mahli: go Eleazar, gai teai donu ana dama.

<sup>29</sup> Mai i de hagadiilinga o Kish: tama daane a Kish go Jerahmeel.

<sup>30</sup> Dama daane a Mushi: go Mahli, ma Eder, aama Jerimoth.

Aanei hagadiilinga o Levi, ma olaadeu huaabodu.

<sup>31</sup> Denga daane nei ne dada hogi olaadeu duuhanga hegau bei olaadeu daina go denga daane de aamuli o Aaron, i mada i mua o de hodooligi go David ma Zadok, ma Ahimelek, aama dagi o denga huaabodu o de gau haimeedabu ma dagi o de aamuli o Levi. Gai ne dagodo daudahi donu huu delaadeu hai ne hili ai dangada i de huaabodu o taina madua aama taina gauligi.

## 25

### *De gau daahili o de temple*

<sup>1</sup> Gai David ma dagi o denga daane hebagi ne hili hanu dama daane a Asaph, ma Heman aama Jeduthun gi pasa pelaabisi, ma de hagadangidangi i denga *lyre* ma *harp* aama *cymbal*. Aanei ingoo o denga daane ne haia hegau nei aama alaadeu hegau:

<sup>2</sup> Mai i dama daane a Asaph: go Zaccur, ma Joseph, ma Nethaniah, aama Asharelah. Gai go Asaph delaadeu damana e dagina gilaadeu, gai gilaadeu ne pasa pelaabisi bei dagodo taagina a de hodooligi.

<sup>3</sup> Gai mai i dama daane a Jeduthun: go Gedaliah, ma Zeri, ma Jeshaiiah, ma Shimei, ma Hashabiah, aama Mattithiah, e dogoono gilaadeu. Gai go Jeduthun delaadeu damana e dagina gilaadeu, gai gilaadeu ne pasa pelaabisi, ma de hagamangidangi i de *harp* ga hagahe ange de abodonu ma de tuhi TAGI MAOLUNGA.

<sup>4</sup> Mai i denga dama daane a Heman: go Bukkiah, ma Mattaniah, ma Uzziel, ma Shebuel, ma Jerimoth, ma Hananiah, ma Hanani, ma Eliathah, ma Giddalti, ma Romamti-Ezer, ma Joshbekashah, ma Mallothi, ma Hothir, aama Mahazioth.

<sup>5</sup> Denga daane nei alodahi ni dama nii Heman, taane hai hegau o de hodooligi e daalaa mee e loomai. Dama nei ne gaavange gi de ia bei de hai a de Maadua gu hagatoo donu ai laa e hagaamua ai ia. Gai de Maadua ne gaavange gi Heman e dinoangahulu ma dogohaa dama daane ma e dogodolu damaa hine.

<sup>6</sup> Denga daane nei alodahi go olaadeu damana e dagina, ma e hagamangidangi ai i denga *cymbal* ma *harp* ma *lyre* i de hale o TAGI MAOLUNGA. Gai Asaph, ma Jeduthun, aama Heman go de hodooligi e daalaa ange alaadeu mee e hai.

<sup>7</sup> Gai taelodo o denga daane nei ma olaadeu dangada ne agoago laa i de hai denga daahili ange gi TAGI MAOLUNGA se 288.

<sup>8</sup> Gai denga dama daane aama daane maatua, ma de gau agoago aama dangada alaadeu e agoago ange, ne dada gi iloo ai be aahee alaadeu hegau.

- 9 Tahī mee ne dada, go de huaabodu o Asaph,  
mai i de aamuli o Joseph ne gaavee;  
de lua go Gedaliah, ma ono dangada aama ana  
dama daane ne gaavee – gilaadeu se dogo 12;
- 10 tolu go Zaccur ma ana dama daane ma ono  
dangada ne gaavee – gilaadeu se dogo 12;
- 11 de haa go Izri ma ana dama daane ma ono  
dangada ne gaavee – gilaadeu se dogo 12;
- 12 de lima go Nethaniah ma ana dama daane  
aama ono dangada ne gaavee – gilaadeu se  
dogo 12;
- 13 de ono go Bukkiah ma ana dama daane ma  
ono dangada ne gaavee – gilaadeu se dogo 12;
- 14 de hidu go Jesharelah ma ana dama daane  
aama ono dangada ne gaavee – gilaadeu se  
dogo 12;
- 15 de valu go Jeshaiiah ma ana dama daane aama  
ono dangada ne gaavee – gilaadeu se dogo 12;
- 16 ssiva go Mattaniah ma ana dama daane aama  
ono dangada ne gaavee – gilaadeu se dogo 12;
- 17 de madaangahulu go Shimei ma ana dama  
daane aama ono dangada ne gaavee – gi-  
laadeu se dogo 12;
- 18 de madaangahulu ma dahi go Azarel ma ana  
dama daane aama ono dangada ne gaavee –  
gilaadeu se dogo 12;
- 19 de madaangahulu ma lua go Hashabiah  
ma ana dama daane aama ono dangada ne  
gaavee – gilaadeu se dogo 12;
- 20 de madaangahulu ma dolu go Shubael ma ana  
dama daane aama ono dangada ne gaavee –  
gilaadeu se dogo 12;

- 21 de madaangahulu ma haa go Mattithiah ma ana dama daane aama ono dangada ne gaavee – gilaadeu se dogo 12;
- 22 de madaangahulu ma lima go Jeremoth ma ana dama daane aama ono dangada ne gaavee – gilaadeu se dogo 12;
- 23 de madaangahulu ma ono go Hananiah ma ana dama daane aama ono dangada ne gaavee – gilaadeu se dogo 12;
- 24 de madaangahulu ma hidu go Joshbekashah ma ana dama daane aama ono dangada ne gaavee – gilaadeu se dogo 12;
- 25 de madaangahulu ma valu go Hanani ma ana dama daane aama ono dangada ne gaavee – gilaadeu se dogo 12;
- 26 de madaangahulu ma siva go Mallothi ma ana dama daane aama ono dangada ne gaavee – gilaadeu se dogo 12;
- 27 de madalua go Eliathah ma ana dama daane aama ono dangada ne gaavee – gilaadeu se dogo 12;
- 28 de madalua ma dahi go Hothir ma ana dama daane ma ono dangada ne gaavee – gilaadeu se dogo 12;
- 29 de madalua ma lua go Giddalti ma ana dama ma ono dangada ne gaavee – gilaadeu se dogo 12;
- 30 de madalua ma dolu go Mahazioth ma ana dama aama ono dangada ne gaavee – gilaadeu se dogo 12;
- 31 de madalua ma haa go Romamti-Ezer ma ana dama aama ono dangada ne gaavee – gilaadeu se dogo 12.

## 26

### *De gau hagaloosi haitoga*

<sup>1</sup>Denga hagabuulinga e hagaloosi ina haitoga o de *temple*:

Mai i hagadiilinga o Korah: go Meshelemiah, tama daane a Kore, go dahi dama daane a Asaph.

<sup>2</sup>Meshelemiah e hanu ana dama: tama madua go Zechariah, togolua go Jediael, togodolu go Zebadiah, togohaa go Jathniel,

<sup>3</sup>togolima go Elam, togoono go Jehohanan, gai togohidu go Eliehoenai.

<sup>4</sup>Obed-Edom e hanu hogi ana dama: tama madua go Shemaiah, togolua go Jehozabad, togodolu go Joah, togohaa go Sacar, togolima go Nethanel,\*

<sup>5</sup>togoono go Ammiel, togohidu go Issachar, gai togovalu go Peullethai. (Gai de Maadua ne hagamauuia Obed-Edom.)

<sup>6</sup>Dana dama Shemaiah e hanu hogi ana dama, gilaadeu ni dagi i denga huaabodu o delaadeu damana, go hiidinga gilaadeu ni daane dau.

<sup>7</sup>Dama daane a Shemaiah: go Othni, ma Rephael, ma Obed, aama Elzabad; gai luono dangada go Elihu ma Semakiah ni daane pau ange gi de hegau.

<sup>8</sup>Daane nei alodahi ni hagadiilinga niio Obed-Edom; gilaadeu ma alaadeu dama ma olaadeu dangada ni daane dau ma de mmahi i de hai hegau — hagadiilinga alodahi o Obed-Edom se dinoono ma dogolua.

---

\* **26:4** 2 Sa 6.11; 1 Ch 13.14

<sup>9</sup> Meshelemiah e hanu hogi ana dama daane ma ono dangada, gilaadeu alodahi se dinoangahulu ma dogovalu, gilaadeu ni daane mmahi.

<sup>10</sup> Hosah mai i de aamuli o Merari e hanu hogi ana dama: tagi go Shimri (ia e dee go tama madua, gai dono damana ne hai ia go tagi),

<sup>11</sup> togolua go Hilkiah, togodolu go Tabaliah, gai togohaa go Zechariah. Denga dama daane ma dangada alodahi o Hosah se dinoangahulu ma dogodolu.

<sup>12</sup> Denga hagabuulinga hagaloosi haitoga, mai i denga huaabodu, e hanu hogi alaadeu hegau e hai i de hale o TAGI MAOLUNGA, bei olaadeu dangada ange laa.

<sup>13</sup> Denga huaabodu alodahi ne dada delaadeu haitoga e hagaloosi, go denga dama daane ma denga daane maatua alodahi.

<sup>14</sup> Shelemiah ne dada de haitoga i de baasi i dua. Zechariah dana dama daane ne dada de haitoga i de baasi i ngaiho, ia se daane heiangi i de bale ange dangada i hagasaele danuaa.

<sup>15</sup> Obed-Edom ne dada de haitoga i de baasi i ngaage, gai ana dama daane ne dada de hale doange mee.

<sup>16</sup> Shuppim ma Hosah ne dada de haitoga i de baasi i dai ma de haitoga o Shalleketh, i honga de haiava e mua gi lunga.

Gai ne vaevae ange gi denga hagabuulinga olaadeu masavaa e hagaloosi ai.

<sup>17</sup> E dogoono daane de aamuli o Levi e hagaloosi i dahi laangi i de baasi i dua, e dogohaa i de baasi

ngaiho, e dogohaa i de baasi ngaage, gai e dogolua e hagaloosi de hale doange mee.

<sup>18</sup> Gai lo te buibui\* i de baasi i dai, se dogohaa i de haiava, gai e dogolua i lo te buibui.

<sup>19</sup> Aanei denga hagabuulinga o de gau hagaloosi o denga haitoga, mai i hagadiilinga o Korah ma Merari.

*De gau doange ma dagi ange laa*

<sup>20</sup> Gai hagadiilinga o Levi ange laa: Ahijah go tagi o denga mommee doange i de hale o de Maadua ma denga mee ngadi gaavange dabu.

<sup>21</sup> Denga hagadiilinga o Ladan, mai i de aamuli o Gershon, gilaadeu nei go dagi o denga huaabodu o hagadiilinga Ladan mai i de aamuli o Gershon: dahi go Jehieli,

<sup>22</sup> gai dama daane a Jehieli, go Zetham ma dono daina go Joel. Go gilaau e diiloo ange denga mommee doange mee i de hale o TAGI MAOLUNGA.

<sup>23</sup> Gai mai i de hagadiilinga o Amram, ma hagadiilinga o Izhar, ma hagadiilinga o Hebron, ma hagadiilinga o Uzziel:

<sup>24</sup> Shebuel, dahi hagadiilinga o Gershom, tama daane a Moses, go tagi o dangada e diiloo ange denga mommee doange.

<sup>25</sup> Gai ono dangada go hagadiilinga o Eliezer: dana dama go Rehabiah, dana dama go Jeshaiah, dana dama go Joram, dana dama go Zicri, dana dama go Shelomith.

<sup>26</sup> Gai Shelomith hogi ma ono dangada e diiloo ange mommee alodahi e doange ai mee ngadi

---

\* **26:18** Muna Hebrew i kinei e dee iloo danuaa dono hagadoonunga.

gaavange a de hodoologi go David, ma dagi o denga huaabodu, ma dagi o de mano, ma dagi o de lau, aama dagi o de hebagi ange laa.

<sup>27</sup> Hanu golea ne maua laa i de hebagi ne vvae ange e hagahe age ai de hale o TAGI MAOLUNGA.

<sup>28</sup> Gai mee alodahi a Samuel, taane e gidee mee tigi loomai, ma Saul tama daane a Kish, ma Abner tama daane a Ner, ma Joab tama daane a Zeruah ne vvae gee, ne gaavange alodahi gi Shelomith ma ono dangada gi diiloo ange.

<sup>29</sup> Mai i hagadiilinga o Izhar: go Kenaniah ma ana dama daane, ne hili gi haia hegau i duaahaho, gilaadeu ni dagi ma de gau hagamodu muna i Israel.

<sup>30</sup> Mai i de hagadiilinga o Hebron: go Hashabiah ma ono dangada, gilaadeu se 1,700 daane dau; go gilaadeu e dagina de gau Israel i de baasi i dai o Jordan i hegau alodahi a TAGI MAOLUNGA aama hegau a de hodoologi.

<sup>31</sup> Gai mai de hagadiilinga o Hebron, Jeriah go delaadeu dagi gu sisi i denga atangada o olaadeu huaabodu. (Gai de madahaa ngadau huu o David ne hodoologi ai, gai gilaadeu ga ssala i lodo beebaa, gai gilaadeu ne gidee hanu daane dau mai i magavaa hagadiilinga o Hebron i Jazer o Gilead.)

<sup>32</sup> Gai Jeriah ma ono daane se 2,700, gilaadeu ni daane dau gai ni dagi i denga huaabodu, gai de hodoologi go David ne hili gilaadeu gi dagina de aamuli o Reuben, ma Gad, aama dahi luu baasi de aamuli o Manasseh i mee alodahi a de Maadua, ma mee a de hodoologi.

*Denga hagabuulinga o de hebagi*

<sup>1</sup> Aanei ingoo de gau Israel – go dagi o denga huaabodu, ma dagi o de mano ma dagi o de lau, ma dagi i olaadeu lalo, go dangada e hai hegau ange gi de hodoologi, i hegau alodahi a denga hagabuulinga hebagi e hai hegau, i denga malama alodahi o de ngadau. Gai taelodo o dahi hagabuulinga se 24,000 daane.

<sup>2</sup> Tagi o tahi hagabuulinga go Jashobeam, tama daane a Zabdiel; gilaadeu e hai hegau i tahi malama. Gai taelodo o dono hagabuulinga se 24,000.

<sup>3</sup> Ia se daane de aamuli o Perez, gai go tagi o denga dagi o denga daane hebagi alodahi i tahi malama.

<sup>4</sup> Tagi o de lua hagabuulinga go Dodai taane Ahoh;\* gilaadeu e hai hegau i de lua malama. Gai taelodo o dono hagabuulinga se 24,000.

<sup>5</sup> Tagi o tolu hagabuulinga go Benaiah, tama daane a Jehoiada, tangada haimeedabu; gilaadeu e hai hegau i tolu malama. Gai taelodo o dono hagabuulinga se 24,000.

<sup>6</sup> Deenei Benaiah, taane mmahi i magavaa o tinodolu, gai go ia delaadeu dagi. Gai dana dama daane go Ammizabad go tagi o dono hagabuulinga.

<sup>7</sup> Tagi o de haa hagabuulinga go Asahel taina daane o Joab; gilaadeu e hai hegau i de haa malama, gai Zebadiah, dana dama daane, go tagi i ono lalo. Gai taelodo o dono hagabu-

---

\* **27:4** *Dodai taane Ahoh*: muna nei go lo te Beebaa Greek iai. De Beebaa Hebrew e hai ange hogi *gai taane i ono lalo go Mikloth*.

ulinga se 24,000.

- <sup>8</sup> Tagi o de lima hagabuulinga go Shamhuth, taane Izrah; gilaadeu e hai hegau i de lima malama. Gai taelodo o dono hagabuulinga se 24,000.
- <sup>9</sup> Tagi o de ono malama go Ira, tama daane a Ikkesh, taane Tekoa; gilaadeu e hai hegau i de ono malama. Gai taelodo o dono hagabuulinga se 24,000.
- <sup>10</sup> Tagi o de hidu hagabuulinga go Helez, taane Pelon, mai i de aamuli o Ephraim; gilaadeu e hai hegau i de hidu malama. Gai taelodo o dono hagabuulinga se 24,000.
- <sup>11</sup> Tagi o de valu hagabuulinga go Sibbecai taane Hushah, mai de aamuli o Zerah; gilaadeu e hai hegau i de valu malama. Gai taelodo o dono hagabuulinga se 24,000.
- <sup>12</sup> Tagi o ssiva hagabuulinga go Abiezer taane Anathoth, mai i de aamuli o Benjamin; gilaadeu e hai hegau i ssiva malama. Gai taelodo o dono hagabuulinga se 24,000.
- <sup>13</sup> Tagi o de madaangahulu hagabuulinga go Maharai taane Netophah, mai i de aamuli o Zerah; gilaadeu e hai hegau i de madaangahulu malama. Gai taelodo o dono hagabuulinga se 24,000.
- <sup>14</sup> Tagi o de madaangahulu ma dahi hagabuulinga go Benaiah taane Pirathon, mai i de aamuli o Ephraim; gilaadeu e hai hegau i de madaangahulu ma dahi malama. Gai taelodo o dono hagabuulinga se 24,000.
- <sup>15</sup> Tagi o de madaangahulu ma lua hagabuulinga go Heldai taane Netophah, mai i de

aamuli o Othniel; gilaadeu e hai hegau i de madaangahulu ma lua malama. Gai taelodo o dono hagabuulinga se 24,000.

*Dagi o denga aamuli o Israel*

- <sup>16</sup> Aanei dagi o denga aamuli o Israel:  
tagi o de aamuli o Reuben go Eliezer, tama daane a Zicri;  
tagi o de aamuli o Simeon go Shephatiah, tama daane a Maacah;  
<sup>17</sup> tagi o de aamuli o Levi go Hashabiah, tama daane a Kemuel;  
tagi o de aamuli o Aaron go Zadok;  
<sup>18</sup> tagi o de aamuli o Judah go Elihu, dahi daina o David;  
tagi o de aamuli o Issachar go Omri, tama daane a Michael;  
<sup>19</sup> tagi o de aamuli o Zebulun go Ishmaiah, tama daane a Obadiah;  
tagi o de aamuli o Naphtali go Jeremoth, tama daane a Azriel;  
<sup>20</sup> tagi o de aamuli o Ephraim go Hoshea, tama daane a Azaziah;  
tagi o dahi luu baasi de aamuli o Manasseh go Joel, tama daane a Pedaiah;  
<sup>21</sup> tagi o dahi luu baasi de aamuli o Manasseh e nnoho laa i Gilead go Iddo, tama daane a Zechariah;  
tagi o de aamuli o Benjamin go Jaasiel, tama daane a Abner;  
<sup>22</sup> tagi o de aamuli o Dan go Azarel, tama daane a Jeroham.

Aanei ingoo o dagi o denga aamuli o Israel.

<sup>23</sup> Gai David tee dau denga daane tigi madalua olaadeu ngadau, go hiidinga TAGI MAOLUNGA gu lava i de hagatoo donu bolo ia e hai naa de gau Israel gi soa bei de lagolago o denga heduu.\*

<sup>24</sup> Joab tama daane a Zeruah ne daamada de dau denga daane, gai tee odi i dana dau. Gai de Maadua ne hagaduasala Israel i hiidinga de dau o dangada, gai taelodo nei tee sisi i lodo beebaa e daohi ai laa hegau a de hodoologi go David.\*

*Dangada e diiloo ange goloa o de hodoologi*

<sup>25</sup> Azmaveth tama daane a Adiel, go taane e diiloo ange mommee doange goloa o de hodoologi.

Gai Jonathan tama daane a Uziah, go taane e diiloo ange mommee doange mee i denga vaaenga, ma aduhale nnui, ma aduhale vaaligiligi, aama denga hale dagitilo.

<sup>26</sup> Tagi o de gau hai hegau i lodo veelenga go Ezri, tama daane a Kelub.

<sup>27</sup> Shimei taane Ramah, go taane e diiloo ange denga veelengaa *grape*.

Zabdi taane Shepham, go taane e diiloo ange hua o denga veelengaa *grape* i mommee e doange ai uvaini.

<sup>28</sup> Tagi o denga veelengaa *olive* ma *sycamore* i mommee iai duuduu paa i lalo go Baal-Hanan taane Geder.

Tagi o denga mommee e doange ai lolo go Joash.

<sup>29</sup> Tagi o denga manu haangai i de mommee iai helii i Sharon go Shitrai taane Sharon.

---

\* **27:23** Gen 15.5; 22.17; 26.4      \* **27:24** 2 Sa 24.1-15; 1 Ch 21.1-14

Tagi o denga kaau i lodo geelonga go Shaphat tama daane Adlai.

<sup>30</sup> Tagi o denga gamelo go Obil taane de aamuli o Ishmael.

Tagi o denga *donkey* go Jehdeiah taane Meronoth.

<sup>31</sup> Tagi o denga hagabuulingaa ssiibi go Jaziz taane Hagar.

Aanei denga dagi alodahi e diiloo ange mee a de hodooligi go David.

<sup>32</sup> Gai Jonathan, taina daane o tamana o David, se daane hagasaele niio de hodooligi, ia se daane e donu ange gi mee gai se dangada sisi; go gilaau ma Jehiel, tama daane a Hacmoni e diiloo ange dama a de hodooligi.

<sup>33</sup> Ahithophel se daane hagasaele niio de hodooligi,

Hushai taane Ereka go soa o de hodooligi.

<sup>34</sup> Gai Jehoiada tama daane a Benaiah ma Abiathar ne sui tuulanga o Ahithophel.

Gai Joab go tagi o de hagabuulinga hebagi o de hodooligi.\*

## 28

### *Hagatau a David ange gi de temple*

<sup>1</sup> David ne hagabuni mai gi Jerusalem denga dagi o de henua, ma dagi o denga aamuli, ma dagi o denga hagabuulinga e hai hegau ange laa gi de hodooligi, ma dagi o de mano, ma dagi o de lau daane hebagi, ma denga daane e diiloo ange denga alahenua ma manu haangai a de hodooligi ma ana dama, madali de gau aamua i de hale o de

---

\* 27:34 2 Sa 17.23

hodoologi, ma denga daane mmahi, aama denga daane dau o de hebagi alodahi.

<sup>2</sup> Gai de hodoologi ga duu age ga hai ange, “Ogu daina ma ogu dangada, goodou hagalaangona agu muna. Au gu lodo e hagaduu dahi hale e dugu ai de ngavesi o de hagatoo donu hagaheloongoi a TAGI MAOLUNGA, go de mommee e dugu ange aagena luu vae o taadeu Maadua; gai au ne hagadabena mee e hagaduu ai.\*

<sup>3</sup> Aagai de Maadua ne hai mai gi de au, ‘E dee go koe e hagaduulia de hale e hagadubu ai dogu ingoo, go hiidinga koe se daane hebagi, gai gu soa au dangada ne daa ga maakau.’

<sup>4</sup> Gai TAGI MAOLUNGA de Maadua o Israel ne hili au mai i de huaabodu o dogu damana gi hodoologi i Israel ga hano ai. Ia ne hili Judah gi se dagi, gai ia ne hili de huaabodu o ogu damana mai i de aamuli o Judah, gai ia ne hili au mai i magavaa o ogu daina daane, ma de malangilangi i de au ga hai au gi hodoologi i hongga o Israel alodahi.

<sup>5</sup> Gai ne soa dama a TAGI MAOLUNGA gu gaamai gi de au, gai ia gu hili dagu dama go Solomon gi hodoologi i de nohoanga hodoologi o TAGI MAOLUNGA i Israel alodahi.

<sup>6</sup> Ia ne hai mai gi de au, ‘Go dau dama go Solomon e hagaduulia dogu hale ma de buibui i luu baasi, go hiidinga au gu hili ia e hai ai dagu dama, gai go au dono damana.

<sup>7</sup> Au e hai naa dono nohoanga hodoologi gi deai se ngado mai, noo ia e kana ange e daohi agu hainga ma agu mee gu hagasauaa, bei dono hai e hai hegau ai nei anailaa nei.’

---

\* 28:2 2 Sa 7.1-16; 1 Ch 17.1-14

<sup>8</sup> Deenei ai, au e tala adu muna nei i madamada o de gau Israel alodahi, go de hagabuulingaa dangada o TAGI MAOLUNGA, i mada luu mada o de Maadua: goodou kana ange daudali i muna alo-dahi a TAGI MAOLUNGA doodou Maadua, gi maua ai e goodou i de henua i de henua danuaa nei, ma de dugu ange gi oodou dama gi henua ai i muli mai ga hano ai.

<sup>9</sup> Gai koe, dagu dama go Solomon, koe gi iloo de Maadua o doo damana, ma de hai hegau ange gi de ia i oo lodo alodahi ma au maanadu alodahi, go hiidinga TAGI MAOLUNGA e iloo dagodo o denga lodo alodahi, ma de donu ange gi maanadu alo-dahi. Noo koe e ssala ia, gai koe e gidee naa donu ia; aagai noo koe e huli gee i de ia, gai ia e huli gee naa hogi i de goe ga hano ai.

<sup>10</sup> Koe gi donu iho bolo TAGI MAOLUNGA gu hili goe gi hagaduulia dahi hale, e hai ai de mommee dabu. Gai koe gi lodo mmahi i de hai de hegau nei.”

<sup>11</sup> Gai David ne gaavange gi dana dama go Solomon de hagatau o de velanda o de *temple*, ma denga hale iai, ma ono mommee doange, ma denga aabi i teege i lunga, ma denga aabi e mua gi lodo, aama de aabi o de pono o de tala haisala.

<sup>12</sup> Ia ne gaavange hogi gi de ia de hagatau o mee alodahi aana ne maanadu e hai i lo te buibui de hale o TAGI MAOLUNGA, ma denga aabi i luu baasi, ma denga mommee doange goloa i de hale o de Maadua, ma mommee e doange ai mee ngadi gaavange dabu;

<sup>13</sup> ma de hai e vaevae ai denga hagabuulinga o de gau haimeedabu ma daane de aamuli o Levi,

ma denga hegau alodahi e hai i de hale o TAGI MAOLUNGA, ma goloa alodahi e hai ai hegau i de hale o TAGI MAOLUNGA;

14 ma taemaha o denga goolo e hai ai goloa o dahi hegau ma dahi hegau, ma taemaha o denga selevaa e hai ai goloa o dahi hegau ma dahi hegau

—  
15 go taemaha o denga goolo ne hai ai de mee dugu laama, ma olaadeu laama, ma taemaha o goolo e hai ai dahi mee dugu laama ma ono laama, ma taemaha o denga selevaa e hai ai de mee dugu laama ma ono laama, bei dono hai e hagahai hegau ai,

16 ma taemaha o goolo ne hai ai denga deebele iai pelaoaa i Mada Luono Mada, ma taemaha o selevaa ne hai ai deebele;

17 ma taemaha o denga goolo ne hai ai denga poogo, ma denga beisini aama ubu, ma taemaha o goolo ne hai ai denga boolo; ma taemaha o selevaa ne hai ai denga boolo;

18 ma taemaha o goolo ne hai ai de mommee o ssigidaumaha o mee maanongi; ma dana hagatau e hai ai de hada goolo o denga *cherubim* e doha laa olaau bakau ma e haoli ai de ngavesi o de hagatoo donu hagaheloongi a TAGI MAOLUNGA.

19 [Gai David ne hagadaba,] “Mee nei alodahi gu lava i de sisi bei dagodo de hagatau a TAGI MAOLUNGA gu gaamai gi de au.”

20 Gai David ne hai ange hogi gi dana dama go Solomon, “Koe gi lodo mmahi ma de lo taane i de hai de hegau nei. Aude madagu aabe gi lodo baageaa, go hiidinga TAGI MAOLUNGA de Maadua, dogu Maadua, e noho madali goe. Ia e dee hano

gee naa donu i oo daha aabe tili goe ga dae ai gi de lava hegau o de hale o TAGI MAOLUNGA.

<sup>21</sup> Denga hagabuulinga o de gau haimeedabu, ma de aamuli o Levi gu paba ange, e hai hegau alodahi o de hale o de Maadua. Gai denga labagau alodahi e malangilangi laa, gi balea adu goe i hegau nei alodahi. Gai denga dagi ma dangada alodahi gi daudali i au muna alodahi.”

## 29

### *Mee ne gaavange e hagaduu ai de temple*

<sup>1</sup> Gai de hooligi go David ga hai ange gi dangada alodahi, “Dagu dama go Solomon, taane a de Maadua gu hili, goi gauligi huu gai tigi madua dana maanadu. Gai de hegau nei se hegau laumalie, go hiidinga de hale danuaa nei e dee se hale niio dahi dangada, gai se mommee e niio TAGI MAOLUNGA de Maadua.\*

<sup>2</sup> Gai au gu lava i de hagadabena mee alodahi e hai ai de hale o dogu Maadua – go goolo e hai ai golea goolo, ma selevaa, ma *bronze*, ma *iron*, ma laagau, ma *onyx* lagolago ma hadu hagamogomogo, ma *antimony*\*, ma denga hadu hagalaagii, ma hagadaagangaa hadu hagamogomogo alodahi, aama *marble*.

<sup>3</sup> Gai au gu hagadabena hogi hanu goolo ma selevaa mai i agu mee donu ange gi de hale dabu laa, gai au e gaavange mee nei alodahi i hiidinga dagu hagadubu de hale o dogu Maadua:

---

\* **29:1** 1 Ch 22.5    \* **29:2** De hagadoonunga o de muna nei i muna Hebrew e dee iloo danuaa. *Antimony*se hadu mada uli.

4 e dolumano *talent*† goolo mai i goolo o Ophir, ma e hidumano *talent*‡ selevaa hagamogomogo e haoli ai denga baabaa i lo te hale daumaha,

5 ma goolo ma selevaa a denga labagau e hai ai alaadeu hegau. Gai goai i oodou magavaa e malangilangi i de hagadabu ange ia gi TAGI MAOLUNGA ailaa nei?”

6 Gai dagi o denga hagadiilinga ma dagi o denga aamuli o Israel, ma dagi o de mano ma dagi o de lau daane hebagi, aama denga daane e dagina hegau a de hodoologi, ne malangilangi i de daohi age alaadeu mee ngadi gaavange.

7 Gilaadeu ne gaavange e limamano *talent* ma e dahisemada *daric*§ goolo, ma e dahisemada *talent*\* selevaa, ma e 18,000 *talent*†*bronze*, aama e dahiseguli *talent*‡*iron*.

8 Gai dangada alodahi ne gaavange hogi alaadeu hadu hagamogomogo ga hhao i lo te mommee doange i de hale o TAGI MAOLUNGA, gai Jehiel taane de aamuli o Gershon ga tilo ange.

9 Gai dangada alodahi gu malangilangi i hindinga de malangilangi o denga dagi i de hai de hegau nei; gilaadeu ne malangilangi i de ngadi gaavange alaadeu mee gi TAGI MAOLUNGA. Gai de hodoologi go David gu kona hogi dono malangilangi.

### *Talodalo tuhi a David*

---

† 29:4 3,000 *talente* bei se 110 dana. ‡ 29:4 7,000 *talente* bei se 260 dana. § 29:7 5,000 *talent* ma e 10,000 *darice* bei se 190 dana.

\* 29:7 10,000 *talente* bei se 375 dana. † 29:7 18,000 *talente* bei se 675 dana. ‡ 29:7 100,000 *talente* bei se 3,750 dana.

<sup>10</sup> Gai David ga tuhi TAGI MAOLUNGA i madamada o dangada alodahi, ga hagamada,  
 “Duuhia goe, TAGI MAOLUNGA,  
 de Maadua o demaadeu dubuna madagidagi go  
 Israel,  
 mai i de masavaa e dee ngado mai  
 ga dae ai gi de masavaa e dee ngado mai.

<sup>11</sup> TAGI MAOLUNGA, koe e maolunga, gai e mmahi,  
 koe e mahamaha, koe e kii, gai niiau ssauaa e dagi  
 ai,

gai niiau mee alodahi i de langi ma henua i lalo.\*  
 TAGI MAOLUNGA, niiau de nohoanga hodoologi,  
 gai koe e aamua i hongaa mee alodahi.

<sup>12</sup> De lava ma de hagamada ni mee mai i oo daha,  
 gai go koe tagi o dangada alodahi.  
 Doo lima iai ssauaa ma de mmahi,  
 e hagamada ai dahi ma de gaavange ai de mmahi  
 gi dangada alodahi.

<sup>13</sup> Demaadeu Maadua, gimaadeu e hagamada adu  
 de abodonu gi de goe,  
 ma de tuhi doo ingoo mahamaha.

<sup>14</sup> Aagai se aha donu au, gai ni aha ugu dangada,  
 gai gimaadeu ga maua ai i de ngadi gaavadu mee  
 nei gi de goe? Mee alodahi ne loomai i oo daha, gai  
 niiau donu mee amaadeu e gaavadu nei gi de goe.

<sup>15</sup> Gai gimaadeu ni dangada henua gee i mada  
 luoo mada, gai ni dangada e nnoho gaalinga,  
 bei dagodo omaadeu dubuna madagidagi alo-  
 dahi. Gai omaadeu laangi i henua i lalo e bei de  
 goohunga o de laa e lilo ngaohie laa, e dee maua gi  
 dagodo.

---

\* **29:11** Mat 6.13

16 TAGI MAOLUNGA demaadeu Maadua, goloa lagolago alodahi amaadeu gu gaamai nei e hagaduu ai de hale e hagadubu ai doo ingoo dabu, ne loomai i oo daha, gai ni mee donu niiau.

17 Dogu Maadua, au e iloo bolo koe e tilo dagodo o de lodo, gai koe e malangilangi i de lodo e hai hegau i de heohi. Au ne malangilangi donu i de ngadi gaavadu mee nei i de lodo se muna abodonu, gai au gu gidee hogi bolo oo dangada gu hagabuni nei i kinei anailaa nei, ne malangilangi hogi i de ngadi gaavadu gi de goe.

18 TAGI MAOLUNGA, de Maadua o omaadeu dubuna madagidagi go Abraham, ma Isaac, aama Israel, haia gi dagodo de lodo nei i daho oo dangada ga hano ai, gai haia gi maua e gilaadeu i de hagadubu goe i olaadeu lodo.

19 Gai gaavange gi dagu dama go Solomon de lodo e daohi au hainga i ono lodo alodahi, ma au tala hagadonu, ma au mee gu hagasauaa, gai ia ga hagaduu ai de hale danuaa aagu gu hagadabena mee e hagaduu ai.”

20 Muli mai gai David ne hai ange gi dangada alodahi gu hagabuni laa, “Duuha TAGI MAOLUNGA doodou Maadua.” Gai dangada alodahi ga tuhi TAGI MAOLUNGA, de Maadua o olaadeu dubuna madagidagi, ga ino gi lalo ga daumaha ange gi TAGI MAOLUNGA, ma de hagadubu de hodoologi.

### *De hagasula o Solomon gi hodoologi*

21 Gai gilaadeu ne hai denga sigidaumaha ange gi TAGI MAOLUNGA, ma denga sigidaumaha dudu ange gi de ia i de laangi i ono dua: e mano kaau daane, e mano ssiibi daane, e mano ssiibi gauligi,

madali denga mee unu, aama denga hagadaa-gangaa sigidaumaha ange laa i hiidinga o de gau Israel alodahi.

<sup>22</sup> Gai gilaadeu ga gaimée ma de unu i mada luu mada o TAGI MAOLUNGA i de malangilangi i de laangi laa.

Gai gilaadeu ne hai Solomon tama a David gi hodoologi i de lua hanonga, ga hagadabu ia i de lolo gi hodoologi i mada luu mada o TAGI MAOLUNGA, gai go Zadoktangada haimeedabu.

<sup>23</sup> Gai Solomon gu noho i hongga de nohoanga hodoologi o TAGI MAOLUNGA ga sui ai David dono damana ga hodoologi ai. Gai ia gu hagadagadaga age, gai de gau Israel alodahi ne daudali i ana muna.\*

<sup>24</sup> Gai denga dagi o de henua ma denga daane hebagi mmahi, aama dama daane alodahi a de hodoologi go David gu hagatoo donu bolo gilaadeu ga nnoho i lalo o de hodoologi go Solomon.

<sup>25</sup> Gai TAGI MAOLUNGA ga hagaamua Solomon i madamada o de gau Israel alodahi, ma de hagamahamaha dono nohoanga hodoologi, gai tigi ai ange donu se hodoologi o Israel i mua ne bei ono dagodo.

### *De magau o David*

<sup>26</sup> Gai David tama daane a Jesse ne hodoologi i hongga o Israel alodahi.

<sup>27</sup> Gai ne madahaa ono ngadau ne hodoologi ai i Israel — e hidu ngadau i Hebron, gai e matolu ma dolu ngadau i Jerusalem.\*

---

\* **29:23** 1 Ki 2.12      \* **29:27** 2 Sa 5.4-5; 1 Ch 3.4

<sup>28</sup> Gai ia ne magau i de masavaa oona ne madumadua ai, gai ne daulooloa dono mouli, ia se daane lava ma de laumalie dono hagamabu. Gai dana dama go Solomon ga sui ia ga hodoologi ai.

<sup>29</sup> Gai mee alodahi a David ne hai i de masavaa oona ne hodoologi ai, mai i taamada ga dae ai gi de hagamadi, e sisi i de beebaa a Samuel, taane e gidde mee e loomai, ma de pelaabisi go Nathan, aama Gad, taane e daalaa mee e loomai,

<sup>30</sup> madali dagodo o dono hodoologi, ma dono mmahi, aama dagodo o mee alodahi ne hai i dono masavaa, ma dagodo o Israel ma nohoanga hodoologi o denga henua ange laa.

**De Beebaa Dabu**  
**The Holy Bible in the Nukuoro language of Micronesia**  
copyright © 2022 Wycliffe Bible Translators, Inc.

Language: Nukuoro

Contributor: Wycliffe Bible Translators, Inc.

All rights reserved.

2025-03-14

---

PDF generated using Haiola and XeLaTeX on 18 Mar 2025 from source files  
dated 14 Mar 2025  
8ec6bba8-0c5e-54dd-94ca-afb07f24d254